

I N S T A N C E,

P O V R Maistres Jean de Lacombe , Bachelier en Sorbonne, Guillaume lauffreau, & Bernard Cormouls, Docteurs en Theologie , Curés de Caussade, Serignac, & Malaufe , Syndics des Ecclesiastiques du Diocese de Cahors, deffendeurs.

CONTRE Messire Alaim de Solminiac , Euesque & Comte de Cahors, regulier de S. Augustin, Abbé de Chancelade , demandeur.

ET Henry Mathieu , soy disant Syndic du Diocese, intervenant.



A conduite de Monsieur l'Euesque de Cahors, dans l'administation de son Diocese , n'ayant rien eu de conforme à celle des autres Euesques du Royaume; Cette difference a esté la cause de tant de griefs, par lesquels ses Diocesains sont fatigués & trauaillés depuis si long-temps ; & ces griefs ayants enfanté ce grand nombre de procès qui a fait la plus grande partie de son employ & de son application de vingt années, il ne faut pas s'estonner si les deffendeurs se trouuent reduits de plaider pour la troisieme fois au Conseil du Roy contre leur Prelat, au preiudice de leurs summissions aux ordres de l'Eglise , & de la iustice temporelle , & du temperamment qui auoit esté heureusement embrassé par la meditation des sages , pour terminer les differents du passé , pour réunir l'Euesque & les Pasteurs , & pour les renvoyer dans la paix & la charité de l'Euangile , & dans la fonction libre & seure de leur ministere, telle qu'elle doit estre de droit diuin , & humain pour le bien vniuersel de l'Eglise , & pour la consolation, le bon-heur, & la felicité des Fidelles.

Il est aussi de la verité constante , plainement iustificié dans la notorieté publique , que Monsieur l'Euesque de Cahors a prouqué cette contestation , & qu'il y a témoigné vne inclination si violente, que les deffendeurs & les autres Curés du Diocese, ont inuti-

A

lement tenté tous les expedients de douceur & de bien-seance , pouuoient l'estouffer dans la source , de sorte que tout ce qui est de l'opiniastreté , dans vne humeur processive , condamnée par toutes les maximes canoniques & ciuiles , doit estre imputé à Monsieur l'Euesque de Cahors.

Les deffendeurs n'auancent rien dans cette proposition , dont ils ne rapportent la preme litterale , par le propre faict de Monsieur l'Euesque de Cahors , & c'est pour cela qu'ils supplient avec instance les Iuges de leur conduite & de leurs actions , d'en suspendre leurs sentiments , & de ne point se determiner par la preuention qui se pourroit persuader en faueur de la dignité du Prelat , & de l'exterieur de la cause , contre ceux qui sont obligés de le reconnoistre comme leur Superieur , ny autrement que par la connoissance du faict que la Iustice requiert ; se souuenants à ce propos du deuoir dans lequel le bon Iuge est renfermé selon saint Ambroise , sur le Pseaume 118. *Non indulget propriae voluntati , nihil paratum , vel meditatum domo desert , sed sicut audit , ita indicat.*

En l'année 1651. les deffendeurs furent assignés au Conseil sur la Requête de Monsieur l'Euesque de Cahors , tendante à la cassation des Arrests & procedures du Parlement de Tholose , interuenus au sujet de plusieurs differents meûs entre les parties , & de l'establissement fait des deffendeurs pour Syndics de tous les Ecclesiastiques du Diocese , pretendant que le Parlement auoit entrepris sur l'autorité Episcopale , pour fauoriser tous ceux qui se plaignoient de la rigueur de sa direction.

Et parce que les deffendeurs firent lors connoistre à sa Majesté & à toute la France , que c'estoit avec beaucoup de raison qu'ils auoient reclamé la Iustice temporelle contre leur Prelat , qu'il les auoit traités avec toute sorte de dureté & de vexation , qu'il s'estoit dispensé du deuoir de l'Episcopat en plusieurs choses , qui faisoient peine à toute l'Eglise & au Diocese , & qu'enfin leurs griefs se trouuoient insupportables à eux & aux gens de bien ; Il fut iugé dans les sollicitations de l'affaire , qu'elle se trouuoit de la qualité de celles qui se doiuent assoupir amiablement , & qu'il estoit de l'obligation reciproque des parties , de se sousmettre du tout aux mediateurs proposés , qui estoient deffunct Monsieur de la Margrie , Conseiller ordinaire du Roy en ses Conseils , & Monsieur Vincent , Superieur General de la Mission.

Ainsi , les deffendeurs qui n'auoient pas d'autre desir que leur réunion avec leur Prelat , dans le temperamment de ses rigueurs ,

& de ses procédures & Ordonnances injurieuses à la Prestre & aux fonctions Curiales, firent la premiere demarche de cette reconciliation, & presenterent à Messieurs les Mediateurs, les articles des plaintes & doleances, qui estoient le sujet du procès; Et apres les auoir par eux examinez, ouy & entendu pleinement les Deputés des parties à la suite du Conseil, en presence de Messieurs de Marmiesse & de Villars, pour lors Agens generaux du Clergé de France, ils ordonnerent & arbitrerent du tout, & en dresserent leur resultat du 10. Ianuier 1652. pour seruir de loy & de reigle, de paix & de concorde, entre l'Euesque & les Pasteurs.

Et dans le mesme temps que ces articles furent ainsi arrestés & signés, & desliurés doubles par les Mediateurs aux parties, elles passerent sous cette condition expresse l'Arrest d'expedient du 16. du mesme mois de Ianuier, par lequel sa Majesté euoquant le principal different, cassa & annulla l'acte du Syndicat, les deliberations prises en l'Assemblée Synodale du 20. Avril precedent, & les Arrests & Iugemens du Parlement, & de la Chambre Ecclesiastique, & Cour Metropolitaine de Tholose, avec deffences aux Curés de s'en ayder à l'aduenir, sauf en cas de nouveau different de se pouruoir pardeuant les Iuges qu'il appartiendrait; Ordonnant en outre, que pour l'entreprise faite au Synode, les trois Syndics prioient en plein Synode Monsieur l'Euesque de Cahors d'oublier & leur pardonner ce qui s'estoit passé, & de leuer les censures de droict qu'ils pouuoient auoir encouruës, & ce faisant sur toutes les autres demandes, charges & informations, les parties hors de Cour & de procez, sans despens.

Il ne restoit donc plus qu'à executer & accomplir de bonne foy le contenu de ces Articles & de l'Arrest; & les deffendeurs ayants témoigné à Monsieur l'Euesque de Cahors qu'ils y estoient totalement disposés de leur part, ils le supplierent d'en faire autant de la sienne, mais ils se trouuerent obligés par ses remises & delais, de luy reïterer par escrit leurs supplications & requisitions, suivant les Actes des premier & 12. Mars, premier & 22. Avril 1653 auquel temps il auoit conuoqué l'Assemblée Synodale.

Et continuans par eux leurs requisitions dans cette Assemblée Synodale, la lecture de l'Arrest du Conseil y fut faite de l'Ordonnance de Monsieur l'Euesque de Cahors; & ensuite de la satisfaction conforme à iceluy, & de l'absolution donnée des censures que les deffendeurs pouuoient auoir encouruës; Il fit aussi faire la lecture des articles & conditions, sous lesquelles l'Arrest estoit

4

interuenu, par vn adueu de sa part, qu'il estoit tenu de les accomplir; mais sans les executer en la moindre partie, il fit escrire sur le Registre de la mesme Assemblée, qu'il y auoit respondu & satisfait, article, par article, apres quoy il congedia l'Assemblée.

Cette maniere d'agir de Monsieur l'Euesque de Cahors, fit bien connoistre aux deffendeurs que leurs doulours n'estoient pas guerries par le temperamment de la meditation, & qu'il les alloit renouveler par ses rigueurs ordinaires; & ils furent conseillés de luy représenter par vn autre Acte du 24. du mesme mois d'Avril qu'il estoit en demeure, & qu'il ne pouuoit iamais auoir embrassé l'execution de l'Arrest du Conseil, sans s'estre necessairement obligé de les satisfaire, conformément aux Articles.

Et comme il ne voulut pas se laisser fléchir à leurs supplications reiterées, ils reclamerent l'entremise de Monsieur l'Euesque de Couferans, qui par sa Lettre missiue du 22. Iuin de la mesme année 1653. leur fit sçauoir que s'ils auoient lieu de se plaindre du refus à eux fait sur l'execution des Articles, il estimoit qu'ils pouuoient se pouruoir aux Iuges naturels, apres auoir tenté encores vne fois, les voyes de l'obeissance, & de l'acquiescement raisonnable, à leur Prelat.

Suiuant cét aduis iudicieux & salutaire, ils retournerent aux prieres & aux supplications, & cette submission leur estant aussi inutile que les precedentes, ils se virent contraints de presenter leur Requeste au Parlement de Tholose, tandante à ce que Monsieur l'Euesque de Cahors y fut assigné, pour voir dire qu'il satisferoit aux Articles de paix, en tout ce qu'ils contenoient; ce qui fut ordonné par Ordonnance du 24. Octobre 1653.

Dans ce mesme temps, Monsieur l'Euesque de Cahors estoit en Instance au Conseil, joint à luy les Agents generaux du Clergé de France, contre son Chapitre, le Sieur Hebrard de Saint Sulpice, & le Sieur Pariel, sur le faict de la nomination du Syndic du Diocese, & autres differents pour raison des sommes empruntées sous pretexte des affaires du Clergé; & quoy que les deffendeurs ny fussent point parties, & que cette contestation n'eust rien de commun avec l'execution & accomplissement des articles de paix, neantmoins Monsieur l'Euesque de Cahors, en vertu de l'Arrest introductif de l'Instance, auquel les deffendeurs n'estoient pas nommés, les fit assigner au Conseil, avec deffenses à eux de continuer leurs poursuites au Parlement de Tholose.

Les deffendeurs s'estants presentés au Conseil, pour estre

deschargés de cette assignation & rendus à leurs Juges , Monsieur l'Euesque de Cahors s'auisa de saisir le Conseil par sa Requête verbale du 11. Mars 1654. tendante à l'euocation de ce qui estoit pendant au Parlement , & y faisant droit , que les deffendeurs fussent deboutés de leur Requête , avec deffenses de prendre la qualité de Syndics des Ecclesiastiques du Diocese.

Par Arrest du 7. Aoust de la mesme année 1654. cette demande fut reglée & jointe à l'Instance ; mais par vn sublequent du 12. Ianuier 1655. Monsieur l'Euesque de Cahors & les deffendeurs furent disjoints des autres parties pour ce regard , & le different pendant avec le Chapitre fut terminé diffinitiuement , le sieur Hebrard de Saint Sulpice confirmé au Syndicat pour vn an , & ordonné qu'il seroit procedé à la reuision des comptes du Clergé , si par le Syndic , il estoit iugé necessaire .

Ainsi , ne restant plus au Conseil que le different de Monsieur l'Euesque de Cahors & des deffendeurs sur le fait des articles de paix , & les parties ayants escrit & produit , mesmes les deffendeurs pour estre renuoyés au Parlement de Tholose ; Monsieur l'Euesque de Cahors a mandié l'interuention du Sieur Mathieu , pour s'opposer au nom de tous les Ecclesiastiques du Diocese , à la qualité des deffendeurs , pour declarer que le *Factum* imprimé sous le nom des deffendeurs , ainsi que le contenu és Actes des 8. & 13. Ianuier 1654. estoit vn libelle diffamatoire cõtre Monsieur l'Euesque de Cahors , qui doit estre laceré publiquement , & pour faire imposer silence aux deffendeurs , touchant les deniers imposez & destinez pour le Seminaire , pour les Chanoines reguliers de S. Augustin , & pour l'Hospital des Filles orphelines , & leur enjoindre de porter l'honneur & le respect qu'ils doiuent à leur Prelat , d'vne si eminente vertu , ce qui a esté signifié aux deffendeurs le 9. Ianuier 1658.

D'autre-part , & à la faueur de cette interuention , Monsieur l'Euesque de Cahors a fait signifier sa Requête du 23. du mesme mois , tendante à ce qu'il soit vsé enuers les deffendeurs des corrections , que le droit ordõne contre les faux accusateurs de leurs Euesques , contre les perturbateurs du repos des Dioceses , & contre les rebelles aux Arrests du Conseil , que silence perpetuel leur soit imposé , que le *Factum* du premier procès & les Actes qualifiés de libelles soient lacerés , & que deffenses leur soient faites de se nommer Syndics , ny troubler ses fondations.

Et par Arrest du 8. Fevrier ensuiuant , sa Majesté a retenu à soy & à son Conseil le principal du different des parties , & a ordonné

qu'elles adjoûteront à leurs productions ce que bon leur semblera, pour leur estre fait droict diffinitiuement.

En execution de cét Arrest, Monsieur l'Euesque de Cahors a produit au principal, par sa Requête du 28. du mesme mois, & prentendant que le Sieur Lacombe, l'un des deffendeurs, a esté desobeissant aux Ordres enuoyez dans les Parroisses pour le Iubilé, & s'est porté à entreprendre sur l'autorité Episcopale; Il a conclud par la mesme Requête qu'il luy soit enjoint d'executer ses Ordres & Mandemens, concernant la discipline Ecclesiastique, & le regime de son Diocese.

C'est l'estat auquel se trouuent aujourd'huy les parties; & il est du dessein des deffendeurs, en se conformant à la volôté de sa Majesté d'establiir, Qu'il vacqueroient avec autant de joye que de repos, à leurs fonctions Curiales, si Monsieur l'Euesque de Cahors auoit eu de son costé, l'esprit de paix & de condescendance, dont tous les autres Prelats du Royaume luy fournissent de si beaux & de si pieux exemples.

Que tous les procez & differents arriuez dans le passé, iusques & compris l'année 1651. ont esté terminez diffinitiuement, par les articles arrestez par les Mediateurs, & par l'Arrest d'expedient interuenu en consequence.

Que ces articles & l'Arrest ont esté la loy & les conditions expressees de la paix & de la réünion, que Monsieur l'Euesque de Cahors n'a pû diuiser, de sorte qu'en executant l'Arrest, & receuant la satisfaction y portée, il s'est imposé la necessité d'excuter & accomplir les articles, avec le mesme esprit & la mesme sincerité de la mediation.

Qu'il n'a point satisfait de sa part, & a laissé les choses dans la mesme rigueur & dureté, où elles estoient auparauant les articles.

Qu'outre ce manquement à la bonne foy de la mediation, il a exercé de nouvelles rigueurs enuers les deffendeurs & les autres Curés, & a procedé & ordonné en plusieurs choses de la police & discipline, contre les constitutions Canoniques & Ciuiles, & contre l'vsage vniuersel des autres Dioceses, dont les Diocesains souffrent de si grands maux, qu'il est absolument necessaire d'y apporter vn autre temperamment, par l'entreprise de l'autorité superieure.

Que les deffendeurs ont deub se plaindre, ainsi qu'ils ont fait, en Iustice, en qualité de Syndics des Ecclesiastiques, laquelle leur est legitime & naturelle, iusqu'à l'execution & consommation des articles.

Qu'ils n'ont point manqué au respect qu'ils doivent à leur Prelat, & ne peuuent estre taxés avec quelque verité, ny de faux accusateurs, ny de perturbateurs du repos du Diocese ny de rebelles, ny d'auoir rien escrit depuis les articles, que Monsieur l'Euesque de Cahors puisse prendre pour injure, ou pour libelle.

Que l'interuention du Sieur Mathieu est également friuole & temeraire, doit estre regardée comme l'ouurage d'un visionnaire, & d'un esprit euaporé.

Et qu'enfin, la cause des deffendeurs est si iuste & fauorable dans toutes les parties, qu'elle doit prouoquer pour eux les sentimens & les vœux publics, & les sollicitations de tout le monde, auprès de sa Majesté, pour obtenir de sa Iustice le regime & l'administration du Diocese de Cahors, selon qu'elle doit estre, pour conuenir à l'vnité si essentielle dans l'ordre de l'Eglise Gallicane, & de ses Ecclesiastiques.

Voicy la preuue de toutes ces propositions.

Tout le monde sçait que Monsieur l'Euesque de Cahors n'a point voulu auoir l'esprit de paix & de concorde des autres Euesques; & c'est vne verité qu'il ne peut contredire, estant pleinement iustificée par son propre fait, & par sa maniere de regir & administrer son Diocese, laquelle passera tousiours pour estrange & contraire au droit commun de l'Eglise, si on en iuge par les circonstances qui s'y trouuent, & qui n'ont rien de semblable avec la conduite des autres Prelats.

En effect, depuis vingt années qu'il est Euesque de Cahors, son Diocese a esté si fort remply de procès & de procedures, dont il a esté la cause prochaine, que s'ils estoient tous assemblez, on en pourroit conter cent fois plus en luy seul, qu'en tous les autres Euesques ensemble, de sorte qu'il n'y a point de genre de plaider au Ciuil & au Criminel, & dans toutes les Cours & Iurisdctions Ecclesiastiques, & temporelles, dont il n'ayt vne parfaite experience.

Il a plaidé contre toutes les conditions, & n'a espargné ny son Metropolitain, ny les Prelats ses voisins, & il n'y a point de ses Diocesains en corps, ou en particulier, qui se soit pû exempter de proceder en Iustice avec luy, sur des demandes & des pretentions, que les euenemens ont condamné en sa personne, & luy ont acquis la reputation d'auoir naturellement pour les procès, vne inclination excessiue & infatigable.

Cela s'est verifié plus particulierement dans sa maniere de plaider, qui a eu ses maximes singulieres, & qui a esté telle, que quand

son Metropolitan n'a point eu de complaisance pour ces procedures, il s'est soustrait à son autorité en faueur d'un autre; que si celuy-cy a fait justice aux Prestres, injustement vexés & travaillés par la rigueur de ses Ordonnances, il l'a dépoüillé en mesme temps, par vne autorité contraire; & ainsi des vns aux autres; opposant le spirituel, au temporel, le superieur, à l'inférieur, la Cour de Rome, aux autres Iurisdctions Ecclesiastiques, le Parlement, au Metropolitan, & au Parlement, le Conseil du Roy, sous les pretextes par lesquels on inuite sa Majesté, de proteger & deffendre la dignité Episcopale; si bien que l'on peut dire & penser, que le patrimoine du Diocese & des Diocesains de Cahors, est deuenu la proye de la Iustice, à l'induction de Monsieur l'Euesque.

Que si l'on nous demande d'où peut venir cette methode d'agir, si esloignée des constitutions Canoniques & Ciuiles, si differente de celle des autres Euesques, qui témoignent tant d'aersion aux procès, & si peu conuenable à la vertu & à la pieté, que Monsieur l'Euesque de Cahors presche & persuade dans ses autres applications; nous répondons qu'il n'est pas facile de soumettre le droit Ecclesiastique & la liberté du Sacerdoce, & à la vie & aux maximes du Cloistre & de la Reforme, & que Monsieur l'Euesque de Cahors n'auroit point trouué d'obstacles, aux bonnes intentions qu'il a eu pour l'accroissement de la Religion Chrestienne, s'il se fut proposé de regir son Diocese, selon son deuoir Episcopal, & dans l'ancienne liberté de l'Eglise, laquelle le troisieme des quatre premiers Conciles Oecumeniques, declare consister au droit Apostolique, aux Statuts des Peres, & aux Coustumes anciennes de l'Eglise.

Car, de quelque reproche dont il ayt affecté d'accuser les Prestres & les Pasteurs de son Diocese, pour se former sur eux un sujet de censure & de rigueur, ils n'ont iamais eu d'autres pretentions que d'estre regis & administrés suivant le droit commun de l'Eglise, & tout ainsi que les Ecclesiastiques des autres Dioceses; & s'ils ont plaidé contre leur Prelat, c'est parce qu'il a troublé leurs fonctions & la quietude de leur ministere, par ses nouvelles Ordonnances, totalement contraires au mesme droit, abusives & rigoureuses en toutes leurs parties & promulguées de la sorte, sous l'autorité de son Conseil Monastique, & sans la participation, ny de son Clergé, ny de son Chapitre, ny l'approbation ou validation de la Iustice metropolitaine, ou temporelle.

Et l'on peut voir s'il a eu quelque raison de proceder par cette voye,

voye, puis qu'il est des maximes de l'Eglise vniuerselle, de ne rien changer ny innouer aux anciens establissemens, non plus qu'à la tradition, qui est la loy viuante des Fidelles; & que le saint Siege mesme se reconnoist impuissant, lors qu'il s'agit de déroger aux anciennes constitutions, & aux vsages libres & paisibles des Ecclesiastiques, conformément à ce que le Pape ZOZIME a escrit autres-fois aux Euesques de la Gaule, *Contra statuta patrum condere, aliquid vel mutare nec huius quidem sedis potest autoritas, apud nos enim inconvulsis radicibus vivit antiquitas, cui Statuta Patrum Sanxere reuerentiam.*

C'est donc pourquoy le public doit estre conuaincu, que la vie de Monsieur l'Euesque de Cahors, tire son plus grand esclat des procès & des procedures sans nombre, dont elle est toute parsemée; qu'il n'est signalé dans les monumens publics, que par cette application; qu'elle est en luy sans relasche & sans interualle; qu'elle est la cause veritable du trouble & de la fatigue des deffendeurs; & que s'il estoit venu du temps de S. GREGOIRE le Pape, & de saint BERNARD, ils eussent esté prouqués contre cette contexture de procès de tant d'années, de la mesme indignation avec laquelle ils ont condamné les Prelats, qui preferoient l'employ du Barreau, à celuy de l'Episcopat.

Saint BERNARD a condamné l'occupation continuelle des Ecclesiastiques, dans la discussion & le iugement des procès, encores qu'elle eut pû estre excusée, par l'exercice de la charité Chrestienne, & par l'obligation d'accepter les charges publiques, & d'y faire son deuoir, *Nec abnuendum si dat imperium Deus.*

De quels reproches n'eut-il point tancé Monsieur l'Euesque de Cahors, en apprenant qu'il ne se contente pas de s'appliquer aux procès pendant quelques iours, & quelques nuits de l'année, mais qu'il a tousiours plaidé, & veut tousiours plaider durant tout le cours de sa vie? *Quæso te quale est illud, de manè usque ad vesperam litigare, aut litigantes audire? & utinam sufficeret diei malitia sua, non sunt liberæ noctes. Vix derelinquitur necessitati nature, quod corpusculi pausationi sufficiat, & rursus ad iurgium surgitur.*

Mais, il faut bien croire que Monsieur l'Euesque de Cahors est d'une humeur extraordinairement processive, puis qu'il réueille aujourd'huy les differents meûs & pendâts au Conseil, entre luy & les deffendeurs, à cause de la rigueur de ses procedures: parce qu'il est tres-constant que tout cela estoit esteint & assoupy dans les expédients des articles & des conditions de paix & de réunion, signés

& arrestés par les Mediateurs, & par l' Arrest d' expedient rendu en consequence, du consentement des parties.

Et il ne faut pas qu'il pense esquivier l' effect de cette mediation, en pretendant encores, ainsi qu'il a desia fait, que c'est seulement par cet Arrest que les differents ont esté iugés & terminés, & que la conduite des deffendeurs y a esté condamnée; Car outre que la chose est notoire, que ces articles ont esté la condition de l' Arrest, sans laquelle il n'auroit pas esté rendu en cette forme; il y a deux preuues litterales de cette verité, dont le contredit seroit de mauuaise foy.

L'une, la signature des articles par les Mediateurs, qui porte qu'ils les ont arrestés, & que moyennant cela les parties ont signé & passé l' Arrest d' expedient.

L'autre, la forme de l' Arrest qui se trouue signé des parties & de leurs Aduocats, posterieurement aux articles, & dont l' argument est, qu'il en est l' execution & l' accomplissement.

De sorte qu'il doit passer pour constant, que tous les procez & differents des parties estoient iugés & terminés en diffinitive, par cette voye heureuse & agreable, & qu'elles estoient obligées de viure dans la paix & la concorde de l' Euangile, aux conditions de ces articles & de l' Arrest; c'est à dire, que Monsieur l' Euesque de Cahors deuoit receuoir la satisfaction ordonnée par l' Arrest, & satisfaire au contenu des articles.

Il n'est pas moins constant que ces articles & cet Arrest, ont esté imposés aux parties pour la loy & les conditions de leur accommodement, puis que ç'a esté le temperamment de la mediation, & qu'ils se sont trouués attachés par leur rapport & relation, & par cette estroite & considerable liaison qui s'y remarque; c'est à sçauoir que l' Arrest a esté signé, parce que les Mediateurs auoient ordonné par les articles de tout ce qui estoit à faire, pour faire cesser les griefs & les plaintes des deffendeurs contre leur Prelat, dont tous les Prestres du Royaume se trouuoient beaucoup scandalisés.

Ainsi, quand Monsieur l' Euesque de Cahors a receu & embrassé l' Arrest, pour se preualoir de la cassation du Syndicat des deffendeurs, & des actes & procedures du Parlement de Tholose, & pour les obliger à luy demander l' oubly du passé en plein Synode, il a reconnu qu'il deuoit satisfaire de sa part aux conditions, sous lesquelles cet Arrest estoit interuenu, déclarées & arrestées par les articles, non seulement parce que le contenu des articles & de l' Arrest n'estoient que la mesme loy, qui n'a pû estre diuisée, mais

encores parce que les Actes & les Contrasts , qui sont reuestus & accompagnés de conditions, emportent l'exécution & accomplissement de ces conditions, de la part de ceux qui s'y soumettent.

Et comme il résulte de la délibération Synodale du 23. Avril 1653. que Monsieur l'Euesque de Cahors a fait exécuter l'Arrest, & qu'il l'a exécuté, par la lecture qu'il en a ordonnée; par les submissions qu'il a reçues; & par la main-leuée des censures encourues; il s'ensuit qu'il n'a plus esté libre dans l'inexécution des articles, & qu'il s'est imposé la loy & la nécessité de les exécuter & accomplir de bonne foy.

C'est ce qu'il a reconnu formellement dans l'exécution de l'Arrest, puis qu'en mesme temps, il a fait lire & publier les articles, & a fait écrire qu'il y auoit satisfait, article, par article; mais les defendeurs soustiennent que cette satisfaction est imaginaire, que par ce procedé il s'est moqué du Conseil du Roy, des Mediateurs, & de son Diocese, & qu'il n'en a usé ainsi que dans l'esprit de procès & de trouble, & dans le dessein de continuer ses rigueurs & ses vexations enuers les deffendeurs, & se maintenir par luy, dans l'indépendance de toute superiorité, à la desolation de son Diocese.

Pour entrer dans la connoissance de ces verités, il est nécessaire d'examiner dequoy Monsieur l'Euesque de Cahors estoit tenu & obligé par les articles de paix; & il faut faire sur ce sujet vne premiere reflexion, qu'encores qu'ils soient redigés & arrestés par forme de demandes & de supplications de la part des deffendeurs, & de semonces & de prieres de la part des Mediateurs; toutesfois ces semonces & ces prieres n'ont pas moins de force & d'autorité sur luy, que les Loix & les Ordonnances, & toutes les maximes de la plus estroite obligation aux Prelats.

La premiere raison de cette force & autorité, est que les Mediateurs se sont ainsi voulu accommoder à la bien-sceance de la dignité Episcopale, pour en conseruer l'esclat & le lustre; mais ils n'ont pas delaisné de decider, que Monsieur l'Euesque de Cahors estoit tenu de faire & accomplir ce dont ils l'ont prié & requis, parce que leur priere a esté l'effect de la délibération prise entr'eux sur le different, comme d'une chose iuste & nécessaire.

Il est des maximes de la Iurispudence Romaine, que la priere fait vne loy nécessaire dans le fideicommiss; & que quand le testateur prie & requiert, il determine aussi positiuement, que s'il ordonnoit & commandoit; de sorte que toutes les paroles qui peuvent

declarer sa volonté , equipollent à vne Ordonnance formelle & positive.

C'est ainsi qu'en parle la loy seconde , au Code *Communia de legatis. Omne verbum significans testatoris legitimum sensum legare vel fideicommittere volentis , utile atque validum est : siue directis verbis , quale est iubeo fortè : siue precarijs vtatur testator , quale est rogo, volo, mando , fideicommitto.*

Et on ne doutera iamais , par l'argument & la iuste application de cette loy , que les Mediateurs n'ayent fortement ordonné à Monsieur l'Euesque de Cahors , en vsant de prieres & de sermons , puis qu'ils estoient nommés & choisis par les parties , pour leur dire & declarer a qu'elle satisfaction respectiue, leur deuoir les obligeoit de droit.

La deuxiesme raison , est que les Mediateurs en priant , ont ordonné & enjoint à toutes les parties , parce qu'à l'égard des articles proposés , par eux trouués raisonnables & necessaires , ils ont prié & requis Monsieur l'Euesque de Cahors d'y satisfaire ; & qu'en ce que touche ceux qu'ils n'ont pas approuués, ils les ont rejetté absolument, comme estant certain qu'en l'un & l'autre cas , ils ont procedé en Arbitres & en Mediateurs.

La troisieme, que par l'Arrest du Conseil rendu en consequence des articles de paix , sa Majesté en a fait des loix necessaires , parce qu'elle a ordonné de la satisfaction demandée par Monsieur l'Euesque de Cahors , dans la veüe & la condition de l'execution & accomplissement de ces articles , conformement au consentement des parties.

Il estoit porté au premier article , que Monsieur l'Euesque de Cahors feroit l'honneur aux deffendeurs , & à leurs consorts , de les aymer à l'aduenir , comme vn pere ses enfans , & vn Euesque ses Curés ; & il est notoire à tout le Diocese , que depuis la satisfaction par luy receuë en l'assemblée Synodale , il n'a pas voulu les voir , & que toute sa bien-veillance n'a esté qu'un courroux continuël contr'eux , suiuy de menaces de les mal-traiter , & de leur faire sentir les effets de son indignation, prouuquée par leurs demandes , & par leurs requisitions pour l'execution des articles ; si bien que les deffendeurs preschent d'autant plus inutilemēt l'Euangile, pour l'usage du pardon & de l'oubly des injures , ainsi que de la reconciliation fraternelle, si nécessaire au salut, que leurs Parroissiens remarquent en la conduite de leur Prelat, vne profession ouuerte de vengeance & de ressentiment, qui détruit cette verité constante, & fait

d'estranges rauages , en ceux dont la lumiere n'est pas assez forte pour se conformer à la pureté de la loy , sans auoir esgard aux infractions qui procedent de la corruption de la nature : tous les Diocesains n'estants pas capables d'estre instruits par Sainct MATHIEU , *Quæ dicunt facite & ad opera eorum nolite respicere.*

Le deuxiesme article portoit, que Monsieur l'Euesque de Cahors nommeroit vn Secretaire Ecclesiastique , ou Laïque , tel qu'il luy plairoit , homme de bien , resident en la ville de Cahors , & soluable ; cela fondé sur l'Ordonnance , & sur le droit vniuersel du Royaume, qui le veulent ainsi, pour la seureté des tiltres & des documens du Clergé de chaque Diocese, & pour la liberté & la facilité des expeditions.

C'est à quoy il n'a point satisfait ; & bien loin de là , il a continué pour son Secretaire le Pere Dumas , Religieux profés de l'Abbaye de Chancelade, qui l'estoit auparauant , & dont l'employ est non seulement vne contrauention à la loy publique , mais si onereux aux Ecclesiastiques du Diocese, qu'ils ne peuuent obtenir de luy que les expeditions qui sont agreables à Monsieur l'Euesque de Cahors, parce qu'il demeure auprès de luy dans son Chateau fort , & s'y rend de tres-difficile conuention, iusques-là que quand on est obligé de le prouoquer de son deuoir par les actes de Iustice, on fait emprisonner les Notaires & les témoins , & par cette voye de tyrannie & d'oppression , plusieurs des Ecclesiastiques sont frustrés de leurs droits.

La preuue de l'inexecution de cet article est constante en deux manieres ; par plusieurs Ordonnances & autres expeditions emanées de Monsieur l'Euesque de Cahors, sur le fait de la police & discipline de l'Eglise, des années 1652. 1653. & suivantes , iusqu'à present, signées du Pere Dumas en qualité de Secretaire ; & par vn acte de notoriété pris en la Seneschaussée & Siege Presidial de Cahors, signé de tous les Officiers, qui rendent témoignage qu'il est encores aujourd'huy actuellement Secretaire , & en fait la charge tous les iours.

Par le troisieme article, Monsieur l'Euesque de Cahors estoit obligé d'establir vn Grand Vicaire à Cahors, pour y faire la charge, ainsi que les autres Grands Vicaires des Euesques, de la personne d'un seculier resident en cette Ville là , sans que pour cela le Pere Garat fut exclus d'en faire la fonction selon ses ordres.

Il n'y a non plus satisfait , & n'a point eu d'autre Grand Vicaire que ce Pere Garat , qui est de la mesme condition du Secretaire.

& fait sa demeure & residence dans le mesme Chasteau fort , & qui d'ailleurs n'est point de la qualité requise pour cette Charge, soit parce que c'est vn Religieux profés, mort ciuilement , totalement priué & descheu de la liberté de la Iustice , & beaucoup plus esloigné de la magistrature , que les esclaués qui peuuent esperer d'y arriuer, y estants appellés par le droict des gens ; soit parce qu'il manque de la litterature & de la condescendance des mœurs , dont les Grands Vicaires ne doiuent pas estre moins ornés, que les Euesques, pour tenir leur lieu , au regime de leurs Dioceses.

En effect, il est du deuoir indispensable des Moynes de demeurer dans leurs retraites , & s'abstenir de la direction de toutes les choses de la vie ciuile , & toutes les maximes de la Iustice Ecclesiastique & temporelle conuiennent , qu'ils sont incapables des Charges publiques , comme ne pouuans pas de droict vsfer du pouuoir & de l'autorité , dont leur exemption les délie absolument.

Mais, par la mesme raison , que les Euesques ne doiuent pas establir des Laïques pour leurs Vicaires Generaux , il ne leur est point permis de prendre des Moynes ; les vns & les autres faisant vne profession toute contraire , & opposée à celle des Ecclesiastiques , conformément à ce qui a esté decreté en l'vn des Conciles , *Nam coherere & conjungi non possunt, quibus studia & vota sunt diuersa.*

On tombe aussi d'accord que les qualités du Grand Vicaire doiuent estre grandes , qu'il faut qu'il soit doüé de toutes les vertus Chrestiennes & Morales, & qu'en luy, on puisse voir reluire & regner heureusement la pieté , la justice, la prudence, la force , la patience, & sur toutes choses la moderation, par laquelle toutes les autres vertus se soustiennēt, & inspirent l'amour & la crainte pour les Superieurs , de sorte qu'ils prennent bien garde de ne pas s'exposer au reproche que Dieu faisoit aux Pontifes de l'ancienne loy , par la bouche du Prophete EZECHIEL , *Vos autem cum austeritate imperabatis eis , & cum potentia , & dispersæ sunt oues meæ.*

Et on demande si le Pere Garat , qui n'est connu dans le Diocese de Cahors , que par les vexations & les rigueurs , par lesquelles il a fait si souuent gemir les Ecclesiastiques sans cause , & dont la parole & la plume n'ont point eu d'autre employ que celui de l'œconomie , & du mesnage du reuenu de l'Euesché , peut estre digne de la charge de Grand Vicaire ; si les deffendeurs n'ont pas eu raison d'en demander vn autre de leur ordre ; si les Mediateurs n'ont pas deub y porter Monsieur l'Euesque de Cahors ; & si dans la continuation de l'exercice de cette Charge , par le Pere Garat , iusti-

fiée par plusieurs Ordonnances & Mandemens, postérieurs aux articles de paix, & par le mesme acte de notoriété cy-dessus rapporté, les deffendeurs, qui en sont extraordinairement molestés & trauaillés, au faict de leurs fonctions Curiales, n'ont pas tout sujet de s'escrier au Roy, à la veüe de toute la France, apres le Prophete HIEREMIE, *Recordare domine quid acciderit nobis: Hereditas nostra versa est ad alienos: Domus nostræ ad extraneos: Serui dominati sunt nostri: non fuit qui redimeret de manu eorum.*

Que si l'on pretend de la part de Monsieur l'Euesque de Cahors, que la mesme loy qui l'oblige d'establir vn Grand Vicair seculier, luy laisse la faculté d'y maintenir le Pere Garat: Les deffendeurs respondent, que cette loy qui a eu beaucoup de complaisance pour luy, s'explique entierement pour eux, en ce qu'elle oblige le Grand Vicair de resider à Cahors; à quoy le Pere Garat ne peut iamais satisfaire, à cause de sa condition, & que cette obligation en luy, est son exclusion formelle, par l'autorité de la mediation.

Et si la mesme loy se trouuoit si contraire, qu'elle d'eust demeurer sans effect, il faudroit tousiours exclurre le Pere Garat selon le droit commun de l'Eglise, qui impose la necessité aux Euesques de prendre des Ecclesiastiques pour leurs Grands Vicaires, & qui renferme les Moynes dans leur solitude; qu'il entende quel a esté le sentiment d'HYCO, escriuant des abus de son siecle, *Si vis esse Monachus Curialis, laudas quod non debes, defendis quod non expedit, operaris quod non licet, loqueris quod non decet.*

Au quatriesme article, Monsieur l'Euesque de Cahors estoit tenu, en baillant son approbation aux Vicaires des Curés, d'auoir égard à l'incommodité des vns & des autres, procedant de ce que contre l'usage de tout temps estably dans le Diocese, d'approuuer pour an, il auoit reduit les approbations au caprice du Pere Garat, & les donnoit à des Vicaires esloignés de sept ou huit lieuës, pour des moments, ou du moins pour huit, ou quinze iours, pour vn, deux, ou trois mois; d'où il arriuoit de si grands desordres, que pendant qu'elles estoient ainsi si souuent repetées, les enfans mourroient sans Baptisme, & les autres sans Confession & sans Communion.

Il a laissé les choses dans la mesme rigueur, dût generalement tous les Ecclesiastiques des Dioceses voisins sont si fort preuenus, qu'il n'y en a pas vn qui veuille prendre employ avec les deffendeurs, qui par consequent demeurent sans secours, avec d'autant plus de desolation à la Religion Chrestienne, que les Villes de Gourdon,

Lauferte, Figeac, Moissac, Martel, Caylus, Moncuq, & autres, en chacune desquelles il y a quinze mil Communians, n'ont que leurs Curés & vn seul Vicaire, & que Monsieur l'Euesque de Cahors deffend aux Religieux d'administrer le Sacrement de Confession.

Les deffendeurs ne peuuent pas exprimer dans la verité, de quels malheurs leurs Parroisses ont esté affligées par les trop grandes difficultés apportées par Monsieur l'Euesque de Cahors, en l'approbation des Vicaires; mais ils laissent à penser, s'il ne faut pas que depuis six années, il ne soit mort vn nombre infiny de gens priués de tous les Sacremens, puis que ces années ont esté celles des pestes, & des autres maladies populaires; que pendant qu'elles ont fait vne si grande moisson du genre humain, la pluspart des Curés n'a point eu de Vicaires; & qu'au lieu de trouuer quelque temperamment dans leurs grandes fatigues, par quelques soins charitables & paternels de leur Prelat, ils n'ont eu de son costé que des deffenses fulminantes de se soulagier respectiuelement, à peine de suspension *ipso facto*. tandis qu'il estoit renfermé dans son Chasteau fort, par precaution contre les clameurs & les gémissemens publics, & de peur sans doute que la voix des Fidelles (abandonnés par l'Eglise, dans le temps auquel il estoit du deuoir de ses Ministres d'auoir plus de ferueur) n'eut esmeu en luy, les sentimens de charité & d'obligation de sa dignité Episcopale.

Mais, il n'y a du tout point d'excuse au procedé de Monsieur l'Euesque de Cahors, d'auoir laissé sans Vicaire, pendant cinq années, le Curé de Caussade, qui est vne Ville de la Religion pretendue reformée, dont le territoire est fort estendu, & où il faut combattre iournellement contre ce monstre d'heresie, & par l'assiduité dans les exercices Ecclesiastiques, asseurer les Fidelles contre ses embusches & ses tentations.

Et puis qu'il ne se veut pas relascher de cette estrange & déplorable resolution, ny par la force des maximes de la police de l'Eglise, ny par la persuasion des Mediateurs, ny par les supplications des Curés & des Diocesains, il faut bien necessairement que le bras seculier y apporte quelque ordre, & que par l'entremise de l'autorité superieure, qui est la protectrice des saints Decrets, comme l'azyle asseuré des Prestres injustement trauaillés par leurs Prelats, Monsieur l'Euesque de Cahors soit obligé de se conformer à l'usage si louable & si vtile des autres Dioceses.

Les Mediateurs auoient arresté au cinquiesme article, que
Monsieur

Monſieur l'Eueſque de Cahors ne taxeroit point les Vicaires par luy enuoyés dans les Parroiffes , ſinon en cas de conteſtation avec les Curés, eux oüys , ou deuément appellés.

Il n'a pas delaiffé d'en vſer comme auparauant , & de contraindre les Curés de prendre des Vicaires par luy taxés à cent cinquante , & cent quatre-vingts liures : ſans conſiderer ſi le reuenu des Curés eſt ſuffiſant pour ſouſtenir vne telle deſpenſe, avec celle des autres Charges , qui conſtamment ſont grandes & exceſſiues ; dequoy pluſieurs Curés ſouffrent tant d'oppreſſion , & d'incommodité , qu'outre qu'il y en a quelques-vns qui ſont les Vicaires perpetuels des Prieurés de Monſieur l'Eueſque de Cahors , leſquels n'ont pas chacun ſoixante liures de rente par les mains de leur Curé primitif ; il leur enuoye des Vicaires avec vn eſprit d'indépendance & de contrariété , qui au lieu de concourir à l'edification de leurs Parroiffes , y portent la contention & le deſordre.

Dans le ſixieſme article , il eſtoit dit qu'auſſi parauant la tenue du premier Synode , il feroit reuoir en la preſence de tel conſeil qu'il luy plairoit, ſes Statuts Synodaux, pour eſtre par luy confirmés, interprétés ou moderés , ainſi qu'il appartiendroit , ſauf en cas de plainte de ce qui ſeroit par luy ordonné, à ſe pouruoir par les voyes de droit.

Monſieur l'Eueſque de Cahors a bien fait proceder à cette reuiſion , mais non pas dans les maximes de l'Egliſe , n'y ayant appellé que Monſieur l'Eueſque de Sarlat ſon Coadjuteur , qui a décidé avec luy , ſans oüyr & examiner les griefs des deffendeurs ; ce qui les a obligés de perſiſter à leurs appellations pardeuant le Metropolitan , ſur leſquelles Monſieur l'Eueſque de Cahors ne s'eſt deffendu que par ſins de non receuoir , & comme il en a eſté débouté, il a appellé en la Cour de Rome , pour laiſſer les choſes dans la conſuſion , & donner ſujet de faire dire de luy , *non venit ad lucem, ut non arguantur opera eius.*

Et c'eſt icy où les deffendeurs peuuent perſuader à ſa Maieſté & au Public , que ces Statuts ſont rigoureux & extraordinaires , puis que Monſieur l'Eueſque de Cahors reſuſe de les ſoumettre, ou à ſon Metropolitan , ou à vn conſeil des-intereſſé , pris & choiſi des membres les plus parfaits du Corps Eccleſiaſtique : conformément à la pratique des autres Diocèſes , fondée ſur la tradition Apoſtolique , & ſur les ſentimens des Peres, qui tiennent le conſeil abſolument neceſſaire , *Presbyteris ſicut Episcopis dispensatio myſte-*

*riorum Dei commissa est, & in confectiōe Dominici corporis & sanguinis
confortes sunt cum Episcopis similiter & in doctrina populorum & in
officio prædicandi.*

Il estoit dit par le septiesme article, qu'il maintiendrait les Curés en la liberté de nommer à la pluralité des voix, en plein Synode, vn Syndic du Clergé, soit du Corps des Chapitres, soit du Corps des Curés, en la maniere accoustumée.

Cela n'a point esté fait, parce que Monsieur l'Euesque de Cahors a voulu luy-mesme eslire & choisir le Syndic à sa deuotion, & pour les aduantages particuliers qu'il s'est procuré, ayant l'vne de ses creatures pour Syndic: dont la preuue resulte du grand procès qu'il a eu avec son Chapitre, touchant la nomination du Syndic, auquel est interuenu l'Arrest du 12. Ianuier 1655. qui a confirmé pour vn an le Sieur Hebrard de Saint Sulpice, nonobstant les empeschemens apportés par Monsieur l'Euesque de Cahors: & de ce que Monsieur l'Euesque de Cahors a depuis nommé, estably & continué le nommé Mathieu, qui en fait la fonction depuis trois ans, & qui estant venu en la cause pour fauoriser Monsieur l'Euesque de Cahors, sera reconnu tout à fait indigne de cette Charge, sur la discussion de son interuention, par ses vices & par ses defauts personnels.

On auoit arresté au huitiesme article, que Monsieur l'Euesque de Cahors permettroit que les Auditeurs des Comptes fussent nommés en plein Synode, en la maniere accoustumée.

Il n'en a rien voulu faire; & bien loin delà, il a par son autorité confirmé les mesmes Deputés, pour l'audition & examen des comptes depuis quinze ans: comme si les emplois, qui de droit ne sont qu'annuels, deuoient estre rendus hereditaires par cette voye, & s'il n'estoit pas raisonnable que les Ecclesiastiques de la probité requise, qui ont le plus d'interest à la dispensation des deniers du Clergé y fussent appellés à tour de Roolle, pour y faire obseruer la justice & l'equité, & preuenir les despeses illegitimes & extraordinaires qui surchargent le Clergé, & pour mettre les choses dans la liberté des suffrages opprimés par l'autorité de Monsieur l'Euesque, & du Pere Garat, ainsi que quelques-vns des Deputés ont souuent déclaré.

Le neuuesme article regarde la distribution des Offrandes, laquelle Monsieur l'Euesque de Cahors s'estoit arrogée dans ses visites Episcopales, au prejudice des Curés; & il estoit dit qu'il appelleroit les Curés pour l'employ des deniers; mais bien que les libe-

ralités Chrestiennes soient de beaucoup refroidies, par la misere des Diocesains, & qu'il y ait fort peu de chose à distribuer, il en frustre les Eglises des Curés.

Les deffendeurs auoient fait leur plainte au dixiesme article, de ce que Monsieur l'Euesque de Cahors leur imposoit la loy, aussi bien qu'aux Predicateurs des Aduents & des Carefmes, Festes solennelles & Dimanches de l'année, de prescher en langage vulgaire dans les bonnes Villes, remarquées par les Chapitres, Sieges de Seneschauffées, & Iudicatures Royales, & par leur entrée aux Estats, d'où il resulroit leur peu d'edification: & les Mediateurs ayants esté requis d'y apporter quelque temperamment pour la consolation des honnestes gens, & de faire en sorte qu'en cela il en fut vsé ainsi qu'és autres Dioceses, & que les Sermons fussent en François, laissant la liberté aux Curés & aux Vicaires de faire le Catechisme en la langue du Pays: il auoit esté arresté qu'il auroit égard aux bonnes Villes de son Diocese.

Il n'a point relasché de sa premiere rigueur, & il arriue que les Predicateurs qu'il approuue, à condition de prescher en langage vulgaire, estants Gascons, Auvergnacs, Perigordins & Limousins, la difference & la contrarieté de leurs idiomes font naistre dans la predication de l'Euangile, la mesme confusion qui arriua autrefois, de la mesme cause, dans la construction de la Tour de Babel; de sorte que tout le fruit de cette maniere de prescher se termine à des risées scandaleuses aux Fidelles, & si déplorables pour l'Eglise, où l'heresie luy fait vne guerre continuelle, que les Parroisses se trouuent desertes & abandonnées, dans le temps auquel les Parroissiens y seroient plus assidus, pour satisfaire à leur deuoir, s'ils estoient enseignés avec la langue vniuerselle de la Monarchie, si conuenable à la dignité de la Religion Catholique, & à la bien-sceance de l'Eglise Gallicane, dans les choses qui ne sont pas de la conformité generale du Christianisme.

Monsieur l'Euesque de Cahors estoit supplié, par l'article vnziesme, d'approuuer tels Prestres obituaires des Communautés, ou autres qu'il reconnoistroit auoir les qualités requises, pour ayder les Curés & leurs Vicaires aux Confessions, sans preiudice des Vicaires que les Curés estoient obligés d'entretenir.

Les deffendeurs ont iustificié sur l'article de l'approbation des Vicaires, qu'il n'a point satisfait à cette obligation; & il est de la verité constante, que pour venger sa hayne à l'endroit du Curé de Caussade, qu'il a non seulement refusé d'approuuer ses Vicaires

durant cinq années entieres ; mais apprenant que pendant les maladies populaires , & les Fêtes solennelles , il estoit dans vne application violente de toutes ses fonctions Curiales , il a fulminé vne suspension absoluë contre les Curés ses voisins , qui auoient la volonté de le secourir charitablement : enquoy pourtant il n'est pas succombé, parce qu'il a esté soustenu dans son zele, par la puissance Diuine, qui a bien voulu recôpenser ses longs trauaux, par vne telle protection , & luy conseruer assez de vigueur à l'aage de soixante-cinq ans , pour se rendre à la suite du Conseil , & pour y exciter la Iustice de sa Majesté , contre la maniere de proceder en son endroit , qui a fait penser au public, que c'est avec beaucoup de raison que saint BERNARD a dit, que les pretextes de pieté sont tousjours empruntés , pour couvrir & cacher dans l'homme , ce qui est de l'homme , *Sæpè enim quando seuit in proximum ex vitio iracundiæ , vel veneno inuidiæ , fingit sibi cogitatio quod faciat illud zelo iustitiæ.*

Par les Ordonnances de Monsieur l'Euesque de Cahors, il auoit enjoint aux Curés d'auoir dans leurs Eglises des Calices & des Ciboires d'argent , avec leur Soleil, Tableaux, Tabernacles, & les Ornaments des quatre couleurs à leur despens , bien que la pluspart soient reduits à des portions congruës modiques ; ce qu'estant l'un de leurs griefs , aussi bien que la contribution aux reparations & aumosnes des Eglises : Les Mediateurs auoient arresté au douzième article , qu'il seroit supplié de moderer ses Ordonnances, pour la quantité des couleurs & des ornemens , à la reserue des bonnes Villes, & autres lieux peuplés ; comme aussi de pouruoir à la descharge des Curés , sur ceux qui prennent les gros fruiets , le cas y échéant par les voyes de droict.

Cette moderation n'est point arriuée , & il ne delaisse de molester & trauailler les deffendeurs sur ce sujet , quoy que notoirement dans l'impuissance ; mais outre , que s'il luy plaisoit respan dre dans toutes les Eglises de son Diocèse , le superflu du reuenu de l'Euesché , il y auroit suffisamment du fonds pour tous les ornemens de la dignité , & de la descence du culte Diuin ; Il n'a rien voulu ordonner contre ceux qui joiüssent des gros fruiets des Benefices , qui constamment en doiuent supporter les charges : parce qu'il eut fallu commencer par luy-mesme , à cause des Prieurés de grande valeur , dont il est pourueu , dans lesquels il ne veut que des Vicaires ambulatoires , à raison de soixante liures par an , pour profiter nettement de tout le reste.

On auoit demandé au treizième article, qu'il eut à satisfaire à la

Bulle de sa promotion à l'Episcopat ; & en ce faisant , fournir annuellement la somme de dix-huict cens liures, pour les reparations de l'Eglise Cathedrale , & autres du Diocese , de laquelle il s'estoit deschargé par Transaction passée avec son Chapitre , moyennant le delaissement d'un droit d'annate , ou de fabrique , par luy nouvellement estably sur les Benefices vacans par mort : & les Mediateurs auoient renuoyé les deffendeurs à se pouruoir contre le Chapitre : à quoy ils s'estoient soumis pour le bien de paix.

Mais, puis que leur Euesque n'en a pas l'esprit & l'humeur , & qu'il les prouoque de demander Iustice au Roy, pour ce regard, il leur est tres-facile de le renfermer dans l'obseruation de cette Bulle , sans auoir esgard à la Transaction.

Premierement , parce que la contribution de la somme de dix-huict cens liures est vne condition essentielle , laquelle n'a iamais pû cesser que par la mesme autorité , par laquelle elle a esté imposée ; & d'autant moins qu'elle a eu ses motifs legitimes , c'est à sçauoir la descharge, accordée à Monsieur l'Euesque de Cahors du droit d'annate , & la consideration du reuenu de l'Euesché , qui est connu pour l'un des plus florissant du Royaume.

Secondement , parce que c'est auoir entrepris sur l'autorité du souverain Pontife , de deroguer à ses Decrets immuables , par un Contrat du commerce des hommes.

En troisieme lieu , parce que c'est vne fraude à la loy Canonique & Ciuile , d'auoir commué cette Charge , en l'establissement d'un droit nouueau , qui n'a point de tiltre & de fondement , & qui est d'autant plus injurieux à l'autorité Royale , qu'elle n'y a point participé , encores qu'il soit vray que le temporel des Benefices soit sous sa protection.

Quarto , Parce que les Curés n'ont point esté appellés , ny n'ont presté leur consentement à cet expedient , & que se trouuants les parties les plus blessées dans cette exaction , ils peuuent sans contredit faire remettre les choses aux termes de la Bulle , & du droit Commun du Royaume , conformément à l'Arrest du Parlement de Tholose de l'année 1644. par lequel la Transaction a esté cassée.

Les deffendeurs auoient aussi supplié les Mediateurs au quatorzieme article, qu'ils fussent deschargés de l'imposition de huit cens liures par an , qui se fait sur le Clergé , de l'Ordonnance de Monsieur l'Euesque de Cahors , pour l'entretienement du Seminaire : attendu que la fondation du Seminaire est vne autre condition essentielle de sa Bulle : & il auoit esté ordonné par les Me-

diateurs qu'il y seroit pourueu au Synode lors prochain.

Cette imposition dure tousiours, au preiudice de la deliberation Synodale, par laquelle cette descharge a esté prononcée pour l'aduenir, sans preiudice de la restitution de l'exaction du passé, pour raison dequoy, on a arresté que Monsieur l'Euesque de Cahors & le Syndic du Seminaire, seront poursuiuis en Iustice.

Et certainement, les deffendeurs doiuent estre protegés par sa Majesté en cette occurence, apprenant que Monsieur l'Euesque de Cahors, par son autorité, elude non seulement la teneur de la Bulle, qui doit luy estre si religieuse, mais encores, que sans besoin & sans nécessité, il fait continuer cette imposition, à l'oppression & à la foule des deffendeurs, qui sont assés chargés d'ailleurs.

En effect, il est obligé par la Bulle de fonder le Seminaire à ses frais & despens, & nullement sur le Clergé, *Volumus autem vt dictam Ecclesiam repares, in ea sexcentos ducatos auri annis singulis, ultra id ad quod de iure teneris impendendo; donec eius indigentis prouisum fuerit. alias pro dicta rata fructus tuos non facies, vtque penitentiariam Præbendam & Seminarium ad præscriptum Concilij Tridentini quoque primum erigas, & montem pietatis fieri Cures, conscientiam tuam in his onerantes.*

Deplus, le Concile de Trente ne dit pas que les Seminaires seront fondés & establis pour les Prestres riches & accommodés, mais pour l'instruction & soulagement des pauvres Ecclesiastiques, & cependant pour y estre admis & receu, il faut payer deux cens liures de pension, outre l'ameublement, la chambre, le blanchissage, la chandelle, & les autres vstencilles.

Mais, pourquoy exiger du Clergé cette contribution annuelle de huit cens liures, en faueur du Seminaire, puis qu'outre qu'il doit estre stipendié du reuenue de l'Euesché, il se trouue auoir de grands biens, ou par l'vnion des Benefices simples, ou par les autres aduantages, dont il jouyt paisiblement.

Monsieur l'Euesque de Cahors a vny au Seminaire le Prieuré simple de Balaguiet de douze cens liures, celui de la Vaurette de huit cens liures, celui de saint Luc de cinq cens liures, l'Archiprestre de Belay de quinze cens liures, celui de Gigniac de deux mil liures, & la Cure de saint Barthelemy de Cahors de cinq cens liures: & avec cela, le deffunt Sieur de Saint Sulpice, Grand Archidiacre, luy a fait vn legs d'heritages, de la valeur de douze mil liures en principal, & Monsieur l'Euesque de Cahors luy fait encores plusieurs liberalités de temps à autre, par Mandements.

sur les deniers du Clergé, qui partant a bien raison de se plaindre de cette surcharge, eu esgard que le Seminaire jouÿt de sept à huit mil liures de rente, pour cinq ou six Ecclesiastiques qui le composent sans pension; Ce qui peut aussi faire observer à sa Majesté, & au Public, que Monsieur l'Euesque de Cahors est bien esloigné de la verité, quand il auance d'auoir fait des fondations, pour trois cens mil liures, à ses despens.

Il est encores certain que les deffendeurs peuuent se plaindre iustement de la police & discipline du Seminaire, selon les Ordonnances & Reglemens de Monsieur l'Euesque de Cahors: parce qu'elle ne conuient, ny au Concile de Trente, ny à l'vsage des autres Seminaires; que pour paruenir à la Prestrie, il y faut demeurer trois ans avec pension, & tres-mauuaise nourriture; que par ce moyen tous les pauvres sont exclus de la Prestrie; & qu'enfin la veritable & legitime institution des Seminaires, est de receuoir, nourrir, & edifier gratuitement tous ceux qui se deuoient à l'ordre Ecclesiastique, & se proposent d'y viure & mourir, dans l'Esprit de l'Euangile.

Enfin, les deffendeurs auoient demandé au quinziesme & dernier des articles, que toutes les sommes mal & sans cause, exigées du Clergé, pour les procès & affaires de Monsieur l'Euesque de Cahors, contre deffunct Monsieur l'Euesque de Tulle, & autres, comprises és comptes de quatre années, fussent restituées, & les comptes des six dernieres années rapportés, pour estre reueus & examinés par les Auditeurs, & y faire justice; Et les Mediateurs auoient arresté que Monsieur l'Euesque de Cahors seroit supplié par leurs Lettres, de pouruoir, ou faire pouuoir, au contenu de cet article.

Monsieur l'Euesque de Cahors n'a point eu d'égard aux prieres ny aux semonces des Mediateurs, pour ce qui concerne ces despenses & ces comptes; & c'est ce qui a donné lieu à l'Arrest contradictoire du Conseil, du 12. Ianuier 1655. par lequel la reuision de ces comptes a esté ordonnée, à la diligence du Syndic; mais il a eludé cette reuision iusques à present, au moyen de la nomination qu'il a faite & continuée du Sieur Mathieu pour Syndic, qui est totalement à sa deuotion, & dont le zele, pour le bien du Clergé, n'est autre que la complaisance aueugle qu'il a pour Monsieur l'Euesque de Cahors, pleinement iustificée par sa dissimulation, du prejudice que souffre le Clergé, & par son interuention, laquelle est diametralement contraire à ses interets.

D'où il faut necessairement conclure avec les deffendeurs, que Monsieur l'Euesque de Cahors est en demeure en tout & par tout, sur l'execution des articles de paix, & qu'en cela, il en a vsé de tres-mauuaise foy: puis qu'il n'y auoit rien de si religieux en luy, que de se conformer aux expedients de la mediation; & que sur leur foy & autorité les deffendeurs s'estoient relaschés des grands aduantages qu'ils auoient sur luy, par les Arrests contradictoires du Parlement de Tholose.

Que si ce deffaut d'execution & accomplissement des articles, de la part de Monsieur l'Euesque de Cahors, fait vn grand sujet de plainte pour les deffendeurs: leurs douleurs sont encores bien plus grandes, par le moyen des nouueautés qu'il a introduites, & qu'il introduit iournellement, qui ne sont pas moins surprenantes que scandaleuses, à l'Eglise, aux deffendeurs, & aux Fidelles.

Car, il a fait sçauoir & publier dans son Diocese, qu'il est le Casuiste viuant; que c'est luy seul qui doit estre consulté sur toutes les maximes de la Foy; que tout ce qu'il a fait & ordonné, est par le mouuement du saint Esprit; que les deffendeurs sont obligés de s'y soumettre aueuglement; qu'ils ne peuuent estre agreables à Dieu, qu'en obseruant ses Ordonnances; & que tous les Prestres ordonnés par le Pape à son refus, sans cause legitime, sont bastards & adulterains.

Et il a estably pour maxime dans le Diocese, que les deffendeurs ne sont que simples œconomes de leurs Benefices; qu'il a le droit & le pouuoir de les rendre ambulatories; & qu'apres leur deceds, leurs biens temporels luy appartiennēt, en qualité de Chef & Prince des Apostres: qui sont des propositions d'autant plus estranges, qu'outre que le droit Ecclesiastique & Temporel y est contraire, les deffendeurs ne peuuent pas presumer que Monsieur l'Euesque de Cahors, qui n'est que Bachelier en Theologie, soit si infallible, que de ne point errer: & que luy seul, avec son conseil Monastique, se trouue plus esclairé que ces grands flambeaux de l'Eglise, que l'Eglise mesmes, dans son estat d'infailibilité, ne dedaigne pas de consulter.

Il y a deux autres innouations dans le regime de son Diocese, qui blessent si fort la liberté Apostolique, & celle des consciences, que les deffendeurs, pour leurs Parroissiens & pour eux, sont obligés de demander en cela quelque sorte de temperamment, par l'entremise de l'autorité de sa Majesté.

La premiere, est que depuis quelques années en çà, Monsieur l'Euesque

l'Euesque de Cahors a fait vn establissement de Congregations foraines, composées chacune de vingt-cinq Curés, dont trois d'entr'eux sont destinés pour entendre les autres en Confession : qui par ce moyen se trouuent obligés de quitter leurs Parroisses, & aller se confesser à des Prestres inconneus, esloignés d'eux, de trois & quatre lieues, s'exposants à cette fatigue en toutes saisons, & en tous aages ; & c'est absolument vn ordre tout à fait extraordinaire, & contre les principes de la Foy, & le droit de l'Eglise, qui tend à eneruer la jurisdiction des Curés, & la possession immemoriable en laquelle ils sont, de se confesser les vns, aux autres, conformément aux preceptes de l'Euangile, & dans les circonspectiōs, qui regardent la seureté de leurs consciences.

La deuxiesme, est vn autre establissement de Stations, au sujet des Iubilés publiés dans le Diocese, qui est vne forme de Chambre ardente, composée de huit, ou dix Religieux de son Ordre, à laquelle il oblige les Curés d'aller en Processions, avec leurs Parroissiens, non confessés par eux : afin qu'ils soient ouïs en Confession, par les Gens de cette Chambre, priuatiuement à leurs Curés : comme s'il y auoit quelque apparence, de traiter les choses spirituelles, par l'exemple des Chambres de justice, du temporel du Royaume, si souuent repetées dans la corruption du siecle : & comme si les Curés pouuoient estre frustrés de leur Jurisdiction naturelle, & necessaire, dans vn temps, auquel elle leur doit estre conseruée, avec plus d'exactitude.

Ne seroit-il pas plus vtile à l'Eglise, & vn grand sujet de consolation aux Diocesains, que Monsieur l'Euesque de Cahors laissât les deffendeurs, dans la liberté & l'autorité de leurs fonctions Curiales, à l'égard des Confessions ; & qu'il souffrit qu'ils fussent aydés & soulagés par des Vicaires, & des Prestres approuués, en nombre suffisant, ainsi que par les Religieux, qui sont dans la possession paisible, de Confesser dans les autres Dioceses.

En effect, pourquoy estre si rigoureux, d'interdire la Confession aux Religieux, dans les Villes, & autres endroits, où ils peuvent faire vn si grand fruit, concurremment avec les Curés.

Et pourquoy contrarier si fortement l'Ecriture sainte, en S. Lvc, chap. 5. qui rapporte que les Apostres n'ayants pas assés de forces, pour tirer la grande & copieuse pesche, qu'ils auoient faite *in Verbo Domini*, ils appellerent à leur ayde, ceux qui estoient dans vne autre Nacelle, & *annuerunt socijs qui erant in alia nauī, vt venirent & adiuuarent eos.*

Car, le sens de ce Myſtere, eſt que les Prelats & les Curés ſont représentés par les Apoſtres, & les Compagnons du petit Batteau, ſont les Reguliers qui viennent à leur ſecours, pour le ſalut des Ames.

Mais, que ne trouuera-on point d'eſtrange en la conduite de Monſieur l'Eueſque de Cahors, d'auoir dans ſes viſites rompu tous les Calices & Ciboires d'eſtain, des Parroiſſes de ſon Diocèſe, & de les auoir fait emporter par ſes Religieux, qui les ont conuertis en vaiſſelle, pour ſeruir à leur vſage : d'où il eſt arriué que pluſieurs des Parroiſſes ont eſté priuées de la Meſſe, durant trois & quatre Dimanches : de faire viſiter ſouuent les deffendeurs par quelques-vns de ſes Moynes, au lieu de les conſoler & confirmer dans leurs fonctions, par la preſence d'un Vicaire General, du Corps Eccleſiaſtique : & d'interdire les Curés de leur fonction, dans l'abjuration de l'Hereſie, quoy que la pluſpart Docteurs en Theologie, pour la commettre à des Vicaires forains, qui manquent de ſcience & de credit, & qui par leurs deffauts, rendent inutiles les mouuements de la grace, & les heureuſes diſpoſitions des Curés ?

On n'approuuera pas auſſi, ſa pratique en l'examen des aspirans aux Ordres ſacrés, puis qu'il y fait proceder dans ſon Chateau fort, ſans la participation de tous ceux, que les Eueſques ſes predeceſſeurs, auoient accouſtumé de commettre pour Examineurs, du Corps du Chapitre, des Archipreſtres, des Curés, Ieſuiſtes, Religieux, & Docteurs en Theologie, de l'erudition requiſe en tel cas.

Et on croira ſans doute que les deffendeurs, & les autres Eccleſiaſtiques du Diocèſe, ſont bien greués dans l'adminiſtration du temporel du Clergé, ſous les ordres de Monſieur l'Eueſque de Cahors : puis que ſous le pretexte du rachapt des Offices de Receueurs des Decimes, il a fait emprunter vne ſomme de quarante mil liures, de laquelle il s'eſt fait vn ſi mauuais employ, à l'occaſion du profit de l'augmentation des eſpeces, qu'elle s'eſt diſſipée en pure perte ſur le Clergé, & que cette perte dans le temps preſent, luy reuient à plus de cent ou ſix-vingts mil liures, à cauſe des ſuites qu'elle a eu, faute d'auoir eſté apporté la precaution qui ſe deuoit, dans vne telle occurrence.

Enfin, on peut ſe plaindre contre Monſieur l'Eueſque de Cahors, d'auoir ſouffert le reſtabliſſement des Temples de la Religion pretenduë reformée, dans les lieux de Negrepeliſſe, & le Bias : parce que de droit, cela ne ſe pouuoit ſans vne nouuelle permiſſion de ſa Majeſté, deuëment veriſiée : Ces lieux ayants eſté

descheus & priués de la liberté de l'exercice de leur Religion, par leur rebellion, conformément à l'Arrest du Parlement de Tholose, rendu à la diligence du Curé de Caussade, par le moyen duquel il auoit interdit ce reſtabliſſement durant ſix années, & lequel auoit eſté par luy déliuré à Monsieur l'Eueſque de Cahors, pour en d'autant plus ſouſtenir la force & l'autorité, par ſa dignité Episcopale, & par le zele qu'il témoigne auoir dans ſa conduite, pour l'extirpation de l'Hereſie.

Et que ne peuuent point dire contre luy, les Catholiques du lieu de Negrepeliſſe, d'où il eſt Prieur, & de quelqu'autres endroits de la Religion pretenduë reformée, qui ont eſté delaiffés & abandonnés, ſans qu'il leur ayt donné aucuns Paſteurs, durant les années entieres, les ſix mois, & les trois mois, & ſans auoir daigné les viſiter, ou faire viſiter, pour pouruoir à leurs beſoins ſpirituels, & faire chomer & celebrer les Dimanches & les Feſtes ? puis que dans cette maniere de direction, dont la penſée fait peine, ils ſe ſont veüs (contre la verité de l'Euangile, & ſans complicité) les compagnôs infortunés, de la diſgrace des Iuiſs charnels, dont l'atrocité du crime, auoit fait predire au Prophete OSEE, que par vne iuſte punition de leur aueuglement, & pour marque de leur reprobation, ils ſeroiēt errans, pendant quelques temps, dans le monde: ſans Loy, ſans Roy, ſans Prophetes, ſans Sacrifice, ſans Ceremonies, & ſans aucune marque de Religion, *Quia dies multos ſedebunt filij Iſrael, ſine Rege, & ſine Principe, ſine Sacrificio, & ſine altari, & ſine Ephod, & ſine Theraphim.*

Tout cela fournit de puiffants moyens aux deffendeurs, pour l'eſtabliſſement de leurs qualités de Syndics des Eccleſiaſtiques du Diocèſe, & pour faire voir qu'elle leur eſt legitime & neceſſaire; Car ils n'ont perdu ces qualités, par l'Arrest du Conſeil du 16. Ianuier 1652. que ſous la condition des articles de la mediation, & ſur la preſuppoſition faite, que Monsieur l'Eueſque de Cahors les executeroit & accompliroit de bonne foy; & comme il eſt arriué qu'il n'a pas voulu y ſatisfaire, il arriue auſſi qu'ils rentrent dans leurs droits, & que ces qualités leurs demeurent, iuſques à ce que les articles ſoient executés, & que les differends de l'inexecution, & des autres griefs, ſuruenus du depuis, ceſſent entierement.

En eſſect, il faut bien que les deffendeurs ſoient eſcoutés en Juſtice, ſur le manquement qui leur eſt fait, & à tous les autres Eccleſiaſtiques, des choſes, moyennant leſquelles ils ſe ſont deſiſtés de toutes leurs pretentions, & des Arrests interuenus à leur profit; parce que s'il en eſtoit autrement, & s'il falloir qu'ils n'euf-

sent plus de voix, & de qualités, pour obliger Monsieur l'Euesque de Cahors, de se conformer aux sentiments, & au resultat des Mediateurs, il se trouueroit que la mediation, qui constamment a esté vne voye d'honneur & de sincerité; auroit esté vn piege de surprise en leur endroit, pour leur faire perdre tous leurs droicts, & leurs aduantages, en faueur de Monsieur l'Euesque de Cahors, sans connoissance de cause.

Monsieur l'Euesque de Cahors ne doit pas auancer, que les deffendeurs ayent eu l'enuie de faire reuiure le procès, au preiudice de l'accommodement: puis qu'auparauant que de se pouruoir au Parlement de Tholose, ils ont commencé par les supplications, & continué par plusieurs requisitions respectueuses, conformément aux prudents & salutaires aduis & conseils de Monsieur l'Euesque de Couferans; & puis que par leur Requête présentée au Parlement, ils ne demandoient autre chose, que l'execution de bonne foy, de l'accommodement.

Il n'a pas aussi eu de raison, de les tirer du Parlement, pour les traduire au Conseil: soit parce que le Parlement est le Iuge naturel, tel estably par l'Arrest du Conseil du 16. Ianuier 1652. qui renuoye les parties à se pouruoir où il appartiendroit, en cas de nouveau differend: soit parce qu'ils n'auoient aucun interest en l'Instance, en laquelle ils ont esté assignés, ainsi qu'il a esté iugé par l'Arrest du 12. Ianuier 1655. par lequel ils ont esté disjoints de cette Instance; ce qui fait qu'il est de la Iustice de sa Majesté, de les rendre à leurs Iuges, & faire sentir à Monsieur l'Euesque de Cahors, qu'il n'a pas deub troubler l'ordre de la Iustice distributive.

C'est encor sans sujet veritable, que l'on impute aux deffendeurs, qu'ils ont perdu le respect qu'ils doiuent à leur Prelat; qu'ils sont des faux accusateurs de leur Euesque; & qu'ils troublent le repos du Diocese, & sont rebelles aux Arrests du Conseil: parce que la lecture de leurs actes & de leurs escrits, iustifie qu'il n'y a du tout rien, des termes, & des pretextes que Monsieur l'Euesque de Cahors a pris, pour former la demande en reparation d'injures, sur laquelle il les presse si fort, en la presente contestation.

Et puis qu'il est de l'interest des deffendeurs, de se disculper de la calomnie dont on les taxe, ils y peuuent paruenir facilement, en obseruant que par les deux Actes des 8. & 13. Ianuier 1654. ils n'ont dit autre chose de la conduite de Monsieur l'Euesque de Cahors, sinon qu'il auoit fondé à Cahors, vn Couuent des Reli-

gieux de son Ordre, partie aux frais & despens du Clergé; qu'il auoit disposé des deniers du Clergé sans sa participation; qu'il en auoit nourry & entretenu les Religieux durant douze années; qu'il en auoit détourné & diuertý pour employer à d'autres vsages, au preiudice du Clergé; & qu'enfin, il empeschoit tousiours la reuision des comptes, & laissoit le Clergé dans l'oppression.

Ces termes ne passeront iamais pour injurieux, & n'exposeront pas aussi les deffendeurs, à la peine de droict, establie cõtre les faux accusateurs des Euesques: & d'autant moins, quand on remarquera que ce sont des plaintes également veritables & iustes, & que Monsieur l'Euesque de Cahors ne doit pas appliquer les deniers du Clergé, aux vsages qui ne touchent point le Clergé, & qui sont personnels à Monsieur l'Euesque de Cahors.

La verité de ce diuertissement, resulte non seulement des huit cens liures, qu'il ordonne tous les ans à son Seminaire, mais de plusieurs mandemens notables, pour des despenses, & des liberalités, dont le Clergé n'est nullement tenu; & elle sera bien plus constante par la reuision des comptes, qui est si iustement desirée, & que l'on élude, avec tant de violence, & d'injustice.

Monsieur l'Euesque de Cahors pretend s'excuser, à l'égard de ces huit cens liures, sur ce qu'il dit que ce n'est point vne surcharge, mais vne commutation de despenſe, & qu'il donne au Seminaire, ce que ses predecesseurs Euesques donnoient aux Deputés du Clergé; Et les deffendeurs respondent, que cette commutation est injuste, en deux manieres; l'une, en ce que s'il y a lieu de descharger le Clergé d'une despenſe inutile, & sans cause, cela est d'obligation; l'autre, en ce qu'estant obligé par sa Bulle, de fonder & entretenir le Seminaire, à ses frais & despens, il en doit prendre le fonds sur le reuenu de l'Euesché, & non sur le Clergé.

Pour ce qui est des quatre fondations d'importance, dont il se glorifie, pour y auoir employé cent mil escus, qui sont le Seminaire, l'Hospital des Malades, le Monastere de l'Ordre regulier de saint Augustin, & la Maison des Filles de saint Ioseph; Il est fort aisé aux deffendeurs, de desabuser le Roy & le Public, & decourir qu'il y a beaucoup plus d'ostentation, que de charité.

Il n'y a point premierement de gloire & de merite, en ce qui peut estre du Seminaire, & de la Maison des Filles: puis que quand il y auroit satisfait du patrimoine de son Euesché, il se seroit acquité de la charge à luy imposée, & qui est en luy, vne estroite maxime de conscience.

En deuxiesme lieu, on demande les marques & les vestiges de l'Hospital des Malades, & si l'on peut prendre pour fondation réelle & palpable, vne maison, qui ne se trouue, ny dans la terre, ny sur la terre, & qui n'a point d'autre existence, que celle qu'on luy donne, dans sa description.

Et on ne pense pas que l'on soit si credule au Conseil du Roy, de prendre pour fondation, de la part de Monsieur l'Euesque de Cahors, & à ses despens, ce qu'il a fait touchant l'Hospital; c'est à sçauoir qu'ayant obtenu vn executoire de despens contre la ville de Cahors, de sept mil trois cens liures, il en a fait don à l'Hospital de cette Ville là: que les Consuls en ont payé l'interest durant plusieurs années, & iusques à ce que les Habitans, sages & prudents, ont rejezté la charge de cinquante mil liures, proposée sur eux par Monsieur l'Euesque de Cahors, en faueur de ses Moynes de Chancelade; qu'en hayne de cela, & par vn effect de l'indignation qu'il en a conceuë contr'eux, il a reuouqué le don, & a pressé les Consuls de luy en faire la retrocession, sous pretexte de ce qu'il a déclaré qu'il n'auoit pas eu intention de donner à l'Hospital de saint Iacques, mais bien pour la fondation de l'Hospital de Nostre-Dame, qui est imaginaire; & qu'ils se sont resolus à ce desistement par le Contract du 26. Octobre 1652. plustost que de conseruer vn droit acquis irreuocablement, pour preuenir vn grand procès, qui leur estoit préparé sur ce sujet de la part de Monsieur l'Euesque de Cahors: se souuenants, qu'il est de la prudence, de se relascher de ses interests, quād il est question de la paix publique, & que l'on peut craindre vne opiniastrété puissante, & accreditée en procès, selon les paroles du texte sacré, qui leur ont esté si souuent repetées, par l'ordre, & sous la direction de Monsieur l'Euesque de Cahors, *Non litiges cum homine potente, ne fortè incidas in manus illius, & non contendas cum viro locuplete, ne fortè contra te constituat litem tibi.*

Cependant, cette precaution iudicieuse & loüable, n'a pas eu tout le bon-heur, qu'on en attendoit: parce que Monsieur l'Euesque de Cahors, qui en qualité de President aux comptes de l'Hospital saint Iacques, a passé à son profit les interests de la somme de sept mil trois cens liures, escheus iusques à la reuocation du don, a mis en procès les Consuls, pour en obtenir la condamnation, sauf à repeter sur l'Hospital. Et on appellera cela faire l'aumosne?

Pourra-on aussi prendre pour charité, de la part de Monsieur l'Euesque de Cahors, enuers les pauures de ses Prieurés, sa perse-

uerance dans son refus, de leur faire les aumosnes publiques, qui sont en luy d'une estroite obligation, nonobstant quinze, ou vingt executoires, decernés par le Parlement de Tholose, sur la requisition du Procureur General, qui par ce moyen sont demeurés inutiles & sans effect ?

Et iugera-on que les Eglises qu'il a rebasties soient des grandes marques de sa liberalité, n'y ayant employé que les frais, & les despens, dont il a obtenu condamnation, contre aucuns de ses Diocésains, dans la poursuite de ses procès ?

La fondation du Monastere de l'Ordre de saint Augustin, est l'effect de sa reconnoissance & de son inclination enuers cét Ordre ; & si elle est bien examinée dans les considerations de la probité Chrestienne & morale, on pourra iuger que la louange en est mediocre, ou quoy qu'il en soit, qu'elle ne se rencontre pas dans toutes les conditions, par lesquelles, la pieté se rend immortelle deuant Dieu, & deuant les hommes.

Car, outre le reproche qu'on luy fait, avec verité, d'y auoir employé plusieurs deniers du Clergé, il ne peut nier qu'il ne soit eternellement redevable à sa patrie ; & il n'est pas extraordinaire que Monsieur l'Euesque de Cahors, qui jouyt de cinquante mil liures de rente, & qui pour sa despenfe personnelle, se reduit à la rigueur la plus estroite de l'Euangile: de sorte que sa vie est vne penitence actuelle : dispose de quelque partie de son reuenue, au profit d'un ordre, dont l'accroissement, luy est aduantageux, en toutes manieres, *Et ortus nostri, partem Patria sibi vindicat.*

Que si Monsieur l'Euesque de Cahors pouuoit nous conuaincre par vne demonstration sensible, que de tout le superflu de ses rentes annuelles, il en a fait vne heureuse dispensation dans son Diocese ; qu'il en a soulagé son Clergé ; qu'il en a reparé & doté les Eglises ; qu'il a fondé des Colleges & des Acaemies spirituelles, en faueur de la ieunesse, & des pauvres & des riches ; & qu'enfin il a eu pour les biens temporels, le mesme esprit de rigueur & de penitence qu'il a pour sa personne : nous ne parlerions de sa conduite, qu'en des termes de benedictions, de loüanges, & de gratitude, les caracteres de la reconnoissance vniuerselle, seroient pour iamais ineffaçables, & ce seroit alors que l'ouurage de sa liberalité Apostolique, deuiendroit immortel, *quod nec Iouis ira, nec ignes, nec poterit ferrum, nec edax abolere vetustas.*

Mais comme nous ne deuons pas croire ce que nous ne voyons point, & que rien ne brille & n'esclatte dans le Diocese, que le

grand & superbe bastiment, qu'il a entrepris pour ses Religieux, qui est la terreur & l'épouvante du Pays, par sa domination sur la Ville capitale ; & comme il est notoire à toute la Prouince, qu'à la reserue de ce lieu là, du Chasteau de Merqués, & des autres endroits occupés par Monsieur l'Euesque de Cahors, & par ses Religieux, on ne remarque par tout ailleurs, que des objets de pauvreté, de misere, & de compassion, qui ne peuuent prouoquer la chaleur de sa charité : nous sommes contraints de recourir à l'autorité de saint BERNARD, pour faire decider au Conseil du Roy, si cette dispensation est digne de la loüange, que Monsieur l'Euesque de Cahors veut bien s'attribuer.

Il dit en vn endroit, *fulget Ecclesia in parietibus, & in pauperibus eget: suos lapides induit auro, & suos filios nudos deserit.*

Et en vn autre, qui doit donner quelque matiere de reflexion, à Monsieur l'Euesque de Cahors, détaché de l'obsession de ses Moynes, *Res pauperum non pauperibus dare, par sacrilegij crimen esse dignoscitur. Sanè patrimonium pauperum, facultates Ecclesiarum: & sacrilega eis crudelitate surripitur, quidquid sibi ministri & dispensatores, non utique domini vel possessores, ultra victum accipiant & vestitum.*

C'est ce qui se rapporte au precepte si salutaire que donne saint CYPRIAN à tous les Ecclesiastiques, *Possessiones vobis sed cælestes magis comparate, ubi fructus vestros iuges ac perennes, & ab omni contractu injuriæ secularis immunes, nec rubigo atterat, nec grando cadat, nec sol urat, nec pluvia corrumpat.*

Monsieur l'Euesque de Cahors pretend encor de tirer vne grande loüange, de ce qu'il n'a pris, ny laissé prendre aucuns droicts pour les expéditions emanées de son autorité Episcopale, sous pretexte du seel, ou autrement, ny mesmes pour ses visites, en quoy il dit s'estre relasché de plus de cent mil liures.

Il n'a pas bien digeré cette proposition, si l'on considere que par le droit Apostolique, par les Conciles, & par la tradition des Peres, toutes les graces de l'Eglise ne se doiuent point vendre, qu'il est prohibé par les mesmes autorités, & par les Ordonnances Royaux, de rien exiger, ou souffrir estre exigé, pour toutes ces expéditions, & par exprés, à cause du seel ; & que Saint GREGOIRE escriuant sur ce sujet aux Euesques de Holande, leur persuade, qu'eux & leurs Ministres deuoient detester, comme execrable, la venalité des choses sacrées, *Sicut Episcopum non decet, manum quam imponit vendere, ita minister, vel Notarius, non debet vocem suam, vel calamus venundare.*

Il n'a rien fait aussi en cela, que ce qui a esté de son deuoir, à l'exemple de tous les Prelats, qui ont genereusement combattu contre la Coustume tyrannique, & criminelle, qui par la consideration du profit temporel, a attaché l'ordure, aux choses saintes; & nous apprenons dans la vie d'Yvo Carnotensis, qu'il en vsoit de mesme: *Hoc malum ab initio clericatus mei, semper exhorruui, & postquam ad Episcopatum veni, quantum deo donante preualui, in superficio refecauui.*

Mais, Monsieur l'Euesque de Cahors n'y pense pas, quand il dit qu'il s'est relasché de plus de cent mil liures, de ses droicts de visite: puis que les deffendeurs ont iustifié dans le precedent procès, qu'il auoit taxé tous ces droicts, en faueur de son Seminaire, pour se descharger d'autant, dans la fondation à luy ordonnée: & puis que toutes les maximes Canoniques & Ciuiles, ne permettent pas à l'Euesque, de demander, ny prendre autre chose, que ce qui est necessaire, pour la vie, en passant.

Du temps du Roy Louis le Debonnaire, le droict de visite fut réglé en especes, pour chacun Euesque, dans l'estendue de tout son Diocese, *Ad panes centum, frustingas quatuor, vini sexteria quinquaginta, pullos septem, oua quinquaginta, agnum vnum, porcellum vnum, annonam ad caballos sex, fœni corbes tres, mel, oleum, & cera, quod sufficit.*

Le Concile de Trente exhorte les Euesques de se comporter en cela, Apostoliquement, *Monentur prædicti omnes & singuli ad quos visitatio spectat, vt paterna charitate, Christianoque zelo, omnes amplectantur, ideoque modesto contenti equitatu famulatuque studeant, quam celeberrimè debita tamen cum diligentia visitationem ipsam absoluere.*

Et si, comme on est tres-persuadé, Monsieur l'Euesque de Cahors a tousiours vescu dans la frugalité de la vie Monastique, on peut donc voir qu'il ne s'est pas relasché de cent mil liures: puis que la charge de sa nourriture eut esté bien legere aux Ecclesiastiques: qui la soustiendroient avec beaucoup de joye, & de consolation, s'il les honnoroit souuent de sa presence, avec l'esprit de paix, & de restaurateur, & s'il luy plaisoit de les soulager des visites de ses Religieux, dont ils sont accablés iournellement, à leurs frais & despens: & de telle sorte, qu'il est iustifié par les deffendeurs, que trois de ces Religieux ont sejourné, & ont esté nourris dans la Cure de Caussade, durant deux mois entiers; ce qui a causé vne despenſe de plus de cent cinquante liures, au Sieur de la Combe. Curé.

On ne sçait pas par quel motif Monsieur l'Euesque de Cahors fait vne si grande exagération dans les injures qu'il pretend auoir receuës, & sur la reparation qu'il en demande, en diuisant son interest personnel, d'auec celuy de l'Episcopat, & voulant que l'offense soit remise, pour ce qui le touche, & vengeance, pour ce qui blesse la dignité.

Car, il ne s'agit plus aujourd'huy du premier escrit, que les deffendeurs auoient fait imprimer au procès terminé par les Mediateurs, qui ont renfermé toute la satisfaction pretendue, au contenu de l'Arrest du 16. Ianuier 1652. & quand il en seroit question, les deffendeurs ne seroient pas en peine, de le deffendre, puis qu'ils n'ont crié que contre les griefs à eux faits, & que les Mediateurs ont escouté fauorablement leurs plaintes.

D'ailleurs, les deffendeurs n'ont iamais eu la pensée de blesser la dignité Episcopale, puis qu'ils desirent si ardemment que Monsieur l'Euesque de Cahors les regisse, auec la mesme autorité, dont vsent les Euesques ses voisins; & si tant est qu'il soit si des-interesté personnellement, dans toutes les choses qui ont esté dites, ou escrites: qu'il les oublie, & donne sujet de les oublier? qu'il recoiue les deffendeurs auec l'humanité Apostolique & Pastorale, & il les trouuera dans la plus profonde humiliation, & dans tous les mesmes respects & soumissions, qu'ils ont, & doiuent auoir, pour tous les Prelats du Royaume?

Quant à l'interuention du sieur Mathieu, elle est de la creature de Monsieur l'Euesque de Cahors, animée par luy-mesme, & soustenue par le mesme raisonnement; & de là vient que les deffendeurs y ont deffendu tres-pertinemment, & qu'elle ne peut leur nuire: Mais on demande si le témoignage du mesme Mathieu doit estre receu pour fidelle, & sincere, en veüe du détail de sa vie, qui est vn tableau d'impureté, & d'inconstance.

Tout le Diocese sçait parfaitement que ce Mathieu n'est ny Apostre, ny Euangeliste, ny Docteur, ny Confesseur, ny Martyr, ny Vierge, & chacun n'ignore pas qu'il a esté Chartreux, & Carme: qu'il est passé de la Ville de Gourdon, en celle de Souliac: de la Cure de ce lieu de Souliac, à celle de Casoullés; de celle-cy, à celle de Castelnau de Monratier; de celle-cy, à celle de Nostre-Dame de Soubirous; de celle-cy, à celle de Sainte Bergondis; & enfin de celle-cy, à la charge de Promoteur en l'Officialité: & de cette Charge, à celle de Syndic: le tout par la liberalité de Monsieur l'Euesque de Cahors, qui en fauorisant si ouuertement le

Sieur Mathieu, a fait trouuer en sa personne deux qualités bien contraires, en ce que par tous ces changements d'estats, & de conditions, il a esté regardé avec raison, comme le plus inconstant du Royaume; & que neantmoins il s'est trouué le plus constant, à retenir & reseruer à son profit, autant de pensions, qu'il a resigné de Benefices.

Les Loix Romaines disent, que la perseuerance est la marque d'un esprit arresté, elles entendent de celle, qui est aux choses droites & approuvées; & puis que le Sieur Mathieu n'en a point eu dans la conduite la plus importante de sa vie, il faut croire qu'il n'est pas capable d'en auoir pour la direction des autres; qu'il est fort éloigné des qualités requises pour le Syndicat du Clergé; que le Diocèse est beaucoup à plaindre d'estre sous vn tel guide, dans ses affaires temporelles; & que tout ce qui vient de luy, qui est passé par le canal corrompu de ses fougues, & de ses emportemens, est entaché de la mesme corruption, conformément à ce qu'à escrit sur ce sujet, Sainct GREGOIRE, qui tient pour maxime certaine, que l'inconstance est vn effect de folie, *Corvero stultorum dissimile est, quia dum mutabilitate se varium exhibet, numquam idem quod fuerat manet.*

Ainsi, les deffendeurs ruinent & renuersent l'interuention du Sieur Mathieu, quand ils decouurent ce qu'il est, & qu'il ne deuroit pas estre; parce que s'il a esté capable de changer si souuent, qu'il soit en tout & par tout dissemblable à soy-mesme, il faut necessairement qu'il l'ait esté, des'estre engagé dans cette interuention sans raison, & par le seul mouuement de son caprice, & de son inquietude, prouquée par quelque bile eschauffée: comme d'auoir dit & auancé des propositions fausses, ou erronnées, qui acheuent de consommer la variation de son esprit, & de l'establis en public, pour le modelle du Cameleon, qui prend toutes les couleurs qui se presentent à luy.

Les deffendeurs parlent & escriuent de la sorte, sans alteration, & ils supplient tres-humblement Monsieur l'Euesque de Cahors, de croire qu'ils ne l'eussent pas fait, s'ils n'eussent esté redeuables de leur deffense legitime, à leur propre conscience: qu'ils n'ont point d'autre dessein que celuy de l'Euangile; & que quand il aura pour eux, les sentimens de la paternité, ils redoubleront leur obeïssance filiale, & iustifieront qu'ils n'estiment pas auoir de plus grande felicité, que celle qui doit resulter du deuoir reciproque, du Prelat, & des Pasteurs.

Mais, ils le supplient encores de se souuenir, que le droit Aposto-

lique ne consiste pas seulement dans la rigueur de la penitence, & des mortifications personnelles; Et que pour arriuer à la perfection du Ministère, selon l'esprit de la Mission, il est absolument necessaire de se conduire par les mouuements de saint PIERRE, en la seconde; *Vos autem curam omnem subinferentes, ministrare in fide vestra virtutem, in virtute autem scientiam, in scientia autem abstinentiam, in abstinentia autem patientiam, in patientia autem pietatem, in pietate autem amorem fraternitatis, in amore autem fraternitatis charitatem. Hæc enim si vobiscum adsint, & superent, non vacuos, nec sine fructu vos constituent in Domini nostri Iesus Christi cognitione.*

De là vient que S. PAVL, escriuant aux Theſſaloniens, il leur faisoit sçauoir, que pour s'accommoder à leur foiblesse, il auoit bien voulu descendre du Trône de son autorité Apostolique, pour se communiquer à eux, avec la mesme familiarité, & tendresse, de la nourrice enuers ses enfans, *Cum possemus vobis oneri esse, ut Christi Apostoli; sed facti sumus paruuli in medio vestrum, tanquam si nutrix foueat filios suos.*

Et Saint BERNARD voulant apprendre à tous ceux qui sont constitués en magistrature, & qui ont le pouuoir de iuger des autres, qu'ils doiuent se regarder comme Peres, & non comme Seigneurs, & se proposer de regner avec la benignité, qui est la chaisne agreable des volontés, & des cœurs; Il leur dit en peu de paroles, que c'est ainsi, qu'ils feront vn tres-grand progrès dans l'autorité, à eux commise, *Mansuescite, ponite feritatem, suspendite verbera, producite verba, pectora lacte pinguescant, non typho turgeant.*

La conduite des deffendeurs n'a rien de semblable aux impressions que Monsieur l'Euesque de Cahors en donne; & il faut croire cette verité constante, par son propre adueu, parce qu'il ne dit rien de leurs mœurs, & ne leur fait aucun reproche personnel.

Ils sont conneus pour gens de condition, de naissance, & d'honneur: pour mener vne vie, qui se rapporte à la pureté, & à la dignité de leur caractere: & pour tres zelés au seruice du Roy; pourquoy ils se sont signalés en plusieurs occasions importantes, sans auoir pour cela manqué d'un moment, à leur deuoir Pastoral.

Le Sieur de la Combe, Curé de Caussade, a negocié plusieurs choses, dans les guerres de la Religion pretendue reformée, és années 1627. 1628. & 1631. sous Monsieur le Chancelier, & Monsieur de Verthamont Conseiller d'Estat, tous deux Intendants de Iustice en Guyenne.

Pareillement, sous l'autorité & les ordres de deffunct Monsieur

le Prince de Condé : qui pour marque de sa probité , & de l'estime qu'il en faisoit, l'auoit retenu pour vn de ses Aumôniers ordinaires : & auprès de tous Messieurs les Intendants de Iustice , qui l'ont regardé comme l'vn des plus affectionnés, au bien de la Religion Catholique , & à la cause Royale.

Deffundt Monsieur le Duc d'Espernon, luy commit l'execution de son Ordonnance , portant deffenses de rebastir les Temples de ceux de la Religion pretenduë reformée , sur la denonciation qu'il luy auoit faite de leurs nouuelles entreprises.

En l'année 1642. il fut employé par Monsieur le Cardinal Duc de Richelieu , pour le progrès de la Religion Catholique , & extirpation de l'heresie : & durant les souleuemens populaires de l'année 1643. en Rouërgue , il rendit des seruices notables, prés Monsieur de la Terriere , Intendant de Iustice , & en fut remercié par les mesmes Lettres de cachet de sa Majesté , par lesquelles elle imposa silence à Monsieur l'Euesque de Cahors , en la procedure rigoureuse, qu'il auoit commencé contre luy , sans autre cause , que celle de l'enuie de la gloire moissonnée en cette occurrence.

Et durant les derniers troubles & mouuemens ciuils , il a continué ses seruices sous les ordres de Monsieur le Comte d'Harcourt , & luy a donné des aduis tres-salutaires pour sa Majesté , dont la preuue constante est rapportée par les Ordres , les Lettres , & les Certificats , qui sont és mains du Sieur de la Combe , ainsi que des poursuites de sa part , de plusieurs Ordonnances , & Arrests de la Cour de Parlement de Tholose , pour les choses qui dépendoient de l'execution de l'Edict de pacification, en la Ville de Caussade.

Auec cela , les fruiçts de son application Pastorale , n'ont pas esté des moindres du Diocese , puis qu'il a fait reestabli son Eglise à ses despens , & y a mis pour le moins quinze mil liures de son patrimoine , ou de ses espargnes , dans la frugalité Ecclesiastique : & puis que le troupeau de quinze ou vingt Communians , à luy commis, dans le cœur de l'heresie , & au milieu de l'vn de ses remparts , se trouue aujourd'huy de douze cens : qui viuent avec toute sorte de constance dans leur Foy , parce que la science , la vigilance , & les grands soins de leur Pasteur , les deffendent des pieges , & des embusches, de leurs ennemis domestiques.

Il en est de mesme , à l'égard des Sieurs Iauffreau & Cormouls, dont la candeur & sincerité de vie & mœurs , a esté fortement établie contre les calomnies & les impostures du mensonge, par les Arrests du Parlement de Tholose , & par les Iugemens du Metropoli-

tain, par lesquels ils ont esté déclarés & enuoyés absous, des fausses accusations du Promoteur de l'Euesché de Cahors: dans cette circonstance particuliere, & remarquable, contre Monsieur l'Euesque de Cahors, que ses superieurs ont reconnu qu'il s'estoit laissé preuenir trop legerement, & qu'il estoit necessaire de temperer son indignation, par le iuste temperamment de la loy; c'est à dire, de soustraire à son autorité Episcopale, le Sieur Cormouls & son Vicaire, pour les renuoyer à Monsieur l'Euesque de Castres.

Monsieur l'Euesque de Cahors impute toutesfois deux choses personnelles, au Sieur de la Combe; il dit, qu'il est le seul qui se plaint de ses ordonnances & procedures, & qui contrarie son Prelat: que les autres ne prennent point de part au procès: & qu'il n'a point voulu reconnoistre son autorité, au fait de la publication du dernier Iubilé, & de l'execution de ses Ordonnances: C'est dequoy, il faut se iustifier.

A l'égard du premier point, il y a preuue dans le premier procès, que les deffendeurs ont eu pour compagnons de leurs griefs, & de leurs plaintes, plus de deux cens Curés, tous gens de bien, & fort sages, & moderés, qui comme eux, en ont demandé justice par tout, & ont fait connoistre que la maniere du regime du Diocèse, toute contraire, à celle des autres Prelats, leur estoit onereuse, & tres-impatiente.

Et les deffendeurs produisent vn Aste du 9. May 1658. qui contient les protestations de Maistre Nicolas Colinet, Prestre Curé de l'Eglise de Saint Pierre de Cahors, tant pour luy, que pour les autres Curés, contre les propositions de Monsieur l'Euesque de Cahors, touchant les Congregations foraines, & les Confessions forcées des Curés, hors de leurs Eglises: comme contre la liberté Apostolique, & contre vne nouveauté scandaleuse, à l'Eglise, & à tous les Prestres, tendante à eneruer, & détruire la Iurisdiction naturelle des Curés.

Deplus, on a encor fait des protestations, à l'égard de la descharge de quatre cens liures de decimes annuels, ordonnée en faueur de Monsieur l'Euesque de Cahors, à la foule & oppression du Curé de Realuille, & autres Ecclesiastiques, par la Chambre particuliere du Clergé, qu'il a establie nouuellement, à l'effect de cette descharge, par demembrement de celle de Tholose; car outre qu'il y a beaucoup de peril, de changer l'ancien vsage du Clergé, & non moins d'injustice, de soulager sans cause, Monsieur l'Euesque de Cahors; on soustient que cét établissement nouveau est au dessus

de son pouuoir, & que les Iuges de cette Chambre, qui ont fuiuy la foy de l'absolution, qu'il leur a donnée, du scrupule de conscience, qu'ils auoient du deffaut d'autorité en cette occasion, ont deub prendre garde qu'ils ont osté le bien d'autrui, sur vne confiance vn peu legere, & chancelante; & qu'il n'en est pas de cela, comme du Sacrement du Baptisme, où l'Eglise veut bien suiure la foy, & la croyance des parents, en faueur de leurs enfans.

En ce qui touche le deuxiesme point, le Sieur de la Combe rapporte les Ordonnances à luy enuoyées par Monsieur l'Euesque de Cahors, qu'il a receuës avec respect & submission, & en a fait la publication selon son deuoir; mais si la Procession de la Cure de Caussade ne s'est pas trouuée, au lieu de Realuille, selon, & ainsi qu'il auoit esté ordonné, cela est arriué, premierement par l'equiuoque, & la contrariété des Ordonnances, procedant de la conduite du Pere Dumas Secretaire, l'une, ayant designé la Station, au Samedy 13. Mars, & l'autre, au Samedy 13. Avril.

Secondement, il n'estoit pas possible au Sieur de la Combe, de conduire sa Procession à Realuille, le Samedy 13. Avril, parce que la distance estoit de trois grandes lieues; que la saison estoit si facheuse, que ses Parroissiens luy auoient fait entendre qu'ils estoient allé aux Stations plus prochaines; que ce iour-là il y auoit deux morts qui demandoient la sepulture; & que c'estoit la veille du Dimanche des Rameaux, qui est si celebre, & si solennel dans l'Eglise.

En effect, il estoit sans apparence de dénier la sepulture aux corps morts, laquelle n'est pas seulement du deuoir indispensable du Pasteur, mais de la pieté, & de l'humanité de l'Eglise, & des Fidelles, & dont le retardement est d'autant plus odieux, qu'il tient de la cruauté condamnée dans le droit Canon, par l'extrauagante *detestanda feritatis*.

Et comme la solennité du Dimanche des Rameaux ne se peut iamais obmettre, selon le Rituaire de l'Eglise, le Sieur de la Combe, qui n'auoit point de Vicaire, par le refus de Monsieur l'Euesque de Cahors: & qui par la fulmination de ses interdits, ne pouuoit estre secouru par les Curés & les Prestres ses voisins: estoit obligé de preferer son deuoir Pastoral, à vne Station non essentielle, & dont la commutation, ou la remise, estoit facile, sans desordre, & sans scandale; là où s'il se fut engagé à faire cette Procession, dans cette conjoncture, & ne pouuant retourner à son Eglise, que le lendemain, il se fut mis au danger, de manquer à faire, & celebrer, dans vne Ville de la Religion pretenduë & reformée.

le seruice si solennel , & si important , de l'ouuerture des Pasques.

Peut-estre pourroit-on penser , que le Sieur de la Combe est conuaincu en cela de des-obeïssance , par les propres termes de l'Euangile , selonc Saint MATHIEU , qui rapporte de l'un des Disciples , qu'ayant demandé la permission d'aller enseuelir son pere , auparauant que de s'engager à la fuite de son Maistre , Nostre Seigneur ne voulut point entendre de raison contre son Commandement , *Sequere me & dimitte mortuos sepelire mortuos suos.*

Mais cette objection est éuidemment vn peu trop éloignée d'application , par la difference des temps , du pouuoir , & de l'autorité ; & nous répondons que Monsieur l'Euesque de Cahors n'a pû introduire d'autre loy , que celle de l'Eglise , & que le Sieur de la Combe s'y est parfaitement conformé , quand il s'est occupé à enseuelir ses morts , & satisfaire à son deuoir Pastoral : plutôt que de iuiure & aller chercher à Realuille, son Prelat, qui de droict , & de bien-sceance, apres les sermons & les supplications du Curé, & des Parroissiens de Caussade , où il n'a point esté depuis dix ans ; estoit obligé d'y faire ses Stations, pour les fortifier par sa presence, par ses benedictions , par sa vertu Episcopale , & par l'exemple de sa vie penitente , contre les erreurs , & les attentats du pere du mensonge , & de ses adherans , *Transit inde ut doceret , & predicaret in ciuitatibus eorum.*

Ainsi, le Sieur de la Combe n'ayât point failly dans cette conduite, Monsieur l'Euesque de Cahors n'a pas eu de raison de fulminer, comme il a fait, son Ordonnance du treiziesme Avril, portant injonction au Sieur de la Combe , de conduire sa Procession en l'Eglise de Realuille , pour y gagner le Iubilé , à peine de desobeïssance , & d'estre procedé contre luy par les voyes de droict ; Et il n'en a point aussi , de dire au Roy , que l'on a refusé d'obeïr à ses Ordres & Mandemens , & entrepris sur l'autorité Episcopale.

Mais , on trouuera fort raisonnable la response du Sieur de la Combe, à la signification de cette Ordonnance ; que c'estoit vn effect de la mauuaise humeur de son Prelat, contre luy , vne vexation insigne en son endroit , & vne rigueur sujette à la correction du Supérieur , auquel il a protesté d'appeller , au cas qu'il eut esté attenté quelque chose, sous ce pretexte.

Par là , on peut connoistre , qu'il n'y a point eu de precaution à prendre avec Monsieur l'Euesque de Cahors , contre la mere nourriciere de tous ces differents , qui est son inquietude : qu'en vain les Ecclesiastiques de son Diocèse , les ont voulu preuenir par la maniere

la maniere de le receuoir, semblable à celle du Prophete SAMUEL, en Bethleem, rapportée au premier Liure des Roys : & qu'il a violé cette confederation si solennelle, qu'ils auoient contracté ensemble, dont on se promettoit vne conduite tres pacifique de sa part.

Le Public, à la nouuelle de sa promotion, se trouuoit beaucoup combattu entre l'espoir, & la crainte; ses esperances estoient des plus grandes, dans la veuë de sa vie penitente, répandue par tout, en odeur de sainteté, ainsi que du choix fait de sa personne, sur le rapport de ce grand Ministre d'Estat, dont les lumieres estoient si fortes & si infaillibles : d'autre-part on auoit quelque sujet de craindre, dans la reflexion de la reputation de plaideur, qu'il auoit acquise en l'Abbaye de Chancelade : & c'est pour cela que sa reception auoit eu ses conditions, & qu'on auoit pensé qu'il estoit du bien du Diocese, de s'asseurer avec luy, par la vertu de l'écriture, de la mesme tranquillité, dont on jouïssoit à son aduenement, *Et admirati sunt seniores ciuitatis, occurrentes ei, dixeruntque : pacificusne est ingressus tuus ? & ait : pacificus : ad immolandum domino veni, sanctificamini & venite mecum vt immolem.*

Monsieur l'Euesque de Cahors a bien promis cette paix, par des paroles si saintes, & si inuiolables ; mais il ne s'est pas souuenu de sa promesse, & le manquement qu'il a fait à sa foy, par tant de procès, & d'innouations, a esté la cause veritable des cris, & des plaintes de son Diocese : qui a souuent exprimé ses disgraces, dans la diuision du Prelat, & des Pasteurs, par les paroles de l'Espouse, selon Sainct BERNARD, *Filij matris meae pugnaverunt contra me, quia pugnaverunt contra se, si sic futurum erat, quid necesse erat me concipere.*

Nous pourrions aussi, pour la mesme cause, employer contre cette estrange infraction, la mesme autorité, qui a condamné autresfois, dans le Prophete HIEREMIE, les promesses de la paix, dont certains faux Prophetes entretenoient le Peuple de Dieu, parce qu'elles n'auoient qu'une fausse apparence de verité, *Et sanabant contritionem filiae populi mei ad ignominiam, dicentes : pax, pax : Cum non esset pax.* Le respect que nous portons à Monsieur l'Euesque de Cahors & à sa dignité, nous en oste la pensée, & nous fait seulement dire, qu'il luy estoit d'une estroite obligation de viure en paix avec nous, puis qu'il nous l'auoit iuré si solennellement : & que s'il n'a pû surmonter son inclination contraire, il doit permettre que nous prouoquions en luy, pour l'aduenir, cette pacification si désirée des gens de bien, & de toute l'Eglise : par les termes

sacrés, sur la foy desquels son Diocese a contracté avec luy, *Inquire pacem, & persequere eam.* Psal. 33.

Mais apres tout, il faut estre conuaincu dans tous ces esclarcissemens veritables, & sinceres; que toutes les plaintes de Monsieur l'Euesque de Cahors, contre les deffendeurs, & les Curés leurs Conforts, ne sont que des maximes de son esprit contentieux; qu'ils vivent en bons Prestres, & en bons Curés; & que si la direction Episcopale estoit conforme à l'usage de tous les autres Dioceſes, selon les prieres de tous les Ecclesiastiques, dans leurs Sacrifices continuels, leur condition seroit beaucoup plus digne d'enuie, que de pitié.

Leurs griefs & leurs plaintes seroient changés en des voix d'exultation & d'allegresse: Le poids de leurs fonctions Curiales auroit des douceurs au dessus de toute expression; & ils ne se verroient pas reduits, à cette fascheuse extremite, d'emprunter les paroles du Psalmiste, pour faire comprendre à l'Eglise, combien leur douleur doit estre excessiue, au souuenir de la consolation qui leur resultoit de l'administration des precedents Euesques, & de la dure & cruelle captiuité, qui leur a esté imposée, du depuis qu'ils sont sous celle de Monsieur l'Euesque de Cahors, *Super flumina Babylonis, illic sedimus & fleuimus: cum recordaremur Sion. Et qui abduxerunt nos: hymnum cantate nobis de Canticis Sion. Quomodo cantabimus Canticum Domini in terra aliena?*

Ainsi, les deffendeurs se promettent de la Iustice du Roy, animée par les suffrages publics, que Monsieur l'Euesque de Cahors, & le Sieur Mathieu, seront deboutés de leurs Requestes, & sans y auoir égard, les parties renuoyées au Parlement de Tholose: ou en tous cas, que sa Majesté ordonnera l'execution de bonne-foy des articles de paix, & que toutes les choses de l'administration spirituelle & temporelle du Diocese, seront réglées conformément à ces articles, & au droit Canonique & Ciuil: nonobstant les contrauentions, & les innouations depuis suruenues, qui ont fait le sujet des plaintes des deffendeurs, lesquelles seront réparées.

